

Okushwekuurwa

kw'Obusingye Mushanju bw'Ekanisa

Eshuura ya Munaana

Obusingye Bw'Ekanisa Ya Filadelufia

Okushuuruurwa 3:7-13

Handiikira maraika w'ekalisa y'omuri Filadelufia oti: Ebi nibyo bigambo by'Ogwo orikwera, Ow'amazima, Oine ekishumuruza kya Daudi, Oigura hatagire owaakinga, kandi okinga hatagire owaigura.

Naagira ati: Nimmanya emirimo yaawe. Reeba, Ntaire omu maisho gaawe orwigi orwigwire, oru omuntu weena atarikubaasa kusinga. Nimmanya ngu oine amaani makeye, kwonka okeerinda Ekigambo Kyangye, tiwaayehakana Iziina Ryangye.

Mbwenu reeba, Naakuha ab'omuri Sinagoga ya Sitaane, abeeyeta Abayudaaya, haza batari bo, nibabeiha; Ndyabagyema baije bainame omu maiso gaawe, babone kumanya ku Naakukunzire.

Iwe okarinda Ekigambo eki waagambiirwe aha by'okugumisiriza Kwangye; Naanye nikyo ndikurindira omu bunaku bw'okutegwa okurija omu nsi yoona, okugyeza boona abagituuramu.

Niinyija juba; gumiza kimwe eki oine, hatagira owaakwaka ekirunga kyawe.

Orikusingura Ndyamugira enyomyo omuri hekalu ya Ruhanga Wangye; nawe tarigirugamu ebiro byona; kandi Ndyamuhandiikaho Eiziina rya Ruhanga Wangye, n'eiziina ry'orurembo rwa Ruhanga Wangye, nirwo rurembo Yerusalemu Orusa orurikushuma okuruga omu iguru ahari Ruhanga Wangye, kandi n'Eiziina Ryangye erisya.

Oine amatu, ahurire eki Omwoyo arikugambira amakanisa.

FILADELUFIA

Filadelufia ekaba eri mailo makumi mushanju na itaano obukiizi-bwa-buryo bw'oburugwa-izooba bwa Saadi. Rukaba ruri orurembo rwa kabiri oruhango omuri Lydia. Rukaba rwombekirwe aha bubungo oburengire ahari kamwe omu kyarwo ekyabaire nikirangaanwa omu kukora viinyo. Esente z'ebinushu zaarwo zikaba ziriho omutwe gwa ruhanga Bacchus hamwe n'ekishushani kya Baccante (omunyamurwakazi wa Bacchus). Omu bantu b'omuri orwo rurembo hakaba harimu Abayudaaya, Abakristaayo ab'entsibuko y'Ekiyudaaya, kandi n'abaahindikire kuruga omu butamanya Ruhanga. Orurembo oru rukaba ruteerwa emitsitsa buri kaire, beitu obwire obu rwamazire nibwo bwabaire buraingwa munonga omu ndembo mushanju ez'omu kitabo ky'Okushuuruurwa. Omu mazima orurembo oru rukiriho na hati, nirwetwa eiziina ry'Oruturuuki Alasehir, nari Orurembo rwa Ruhanga.

Emiheeshere y'ebinushu nehamya ku ruhanga w'orurembo oru yaabaire ari Bacchus. Hati Bacchus nikyo kimwe na Ninus nari Nimuroodi. "N'ogwo orikucurirwa," n'obu baingi omuriitwe tumuteekateekaho omu muringo gw'orikukira kuba omu magyenye g'okweshemeza n'obusinzi.

Eki ka nikireetera ebiteekateeko byaitu okumurikirwa. Hanu hariho ekinushu kya sente ekiriho ekishushani kya ruhanga aha rubaju rumwe kandi n'omunyamurwakazi nari nabikazi aha rundi. Hati ekinushu kirekyere ahaiguru. Kiine amakuru oburyo obu kiraagwemu ahansi? Ngaaha sebo, nikiguma kiri ekyo kinushu. Egyo niyo diini y'Ekirooma ya Yesu na Mariya.

Kwonka titurikuteekateeka ahari Rooma yonka. Ngaaha, tihariyo maraaya mukuru wenka. Buzima ngaaha; ahabw'okuba ogwo mukazi, ahabw'obushambani bwe azaire abaana. Abahara be hati n'ebinushu by'empeesha emwe. Aho aha rubaju rumwe rw'egyo nushu baineho okuramya Yesu kandi aha rundi rubaju baineho omunyamurwakazi waabo nari nabikazi kandi nabikazi ugu ahandiika enyikiriza z'ediini ze n'ebigunjano by'ediini n'enyegeya kandi abiguza abantu k'ebiraabajune naahamisiriza ku niwe kandi we wenka oine omushana gw'amazima.

Ka n'ekintu ky'omutaano okushanga ngu obusingye obu nibumanyirwa aha kinushu. Ahakuba nyina n'abahara boona nibagura omuhanda gwabo ogw'okuza omu iguru. Esente nizo barikugurisa etari shagama. Esente atari Omwoyo nizo amaani agarikubatarwa omu maisho. Ruhanga w'ensi egi (mamona) ahumize amaisho gaabo.

Kwonka okukwatanisa kwabo omuri rufu nikwija kurahuka kuhwaho, ahakuba obu nibwo busingye obu Omwoyo arikugambira ahaiguru ati; "Niinyija juba." Eego, ija juba, Mukama Yesu!

OBUSINGYE

Obusingye bw'Ekanisa ya Filadelufia bukabaho kwiha omu mwaka gwa 1750 kuhitsya nka 1906. Obusingye obu, ahabw'amakuru g'eiziina ry'orurembo oru, bwetsirwe Obusingye bwa Rukundo y'Ab'eishe-emwe, nk'oku

Filadelufia kirikumanyisa, “rukundo y'ab'eishe-emwe.”

ENTUMWA

Entumwa aha busingye obu hatariho kubanganisa akaba ari John Wesili. John Wesili akazaarirwa Epworth, ebiro 17 Okwamukaaga, 1703 kandi akaba ari omwe aha baana ikumi na mwenda abaazairwe Samueli na Susanna Wesili. Ishe akaba ari omuheereza omu Kanisa ya Bungyereza; kwonka nikibaasikira kimwe ngu okuhindukira ediini kw'omutima gwa John kukaba kwegamiire munonga aha ky'okureeberaho ky'amagara ga nyina atari aha bwegyese bw'eby'ediini ya ishe. John akaba ari omwegi w'obwengye bwingi. Kikabaho obu yaabaire ari Oxford we na Charles baaba baamemba b'ekibiina ekyabaire nikita eby'omwoyo omu bikorwa omu kuramya okw'aha musingye gw'obumanyi bw'okutuura amazima ago okukira okuhindura enyegyesa engyenderwaho yaabo. Bakataho eky'okubeebembera omu mirimo y'omwoyo, nk'okugabira abooro, kutaayaayira abarwaire n'embohe. Ahabw'eki bakeetwa Abametsodisiti, hamwe n'agandi maziina g'okubashekyerera. John akaba aijurire kimwe okworekwa kwe kw'ekyetengo ky'ediini ahabw'abantu ab'omu nsi okuhitsya obu yaagiire Amerika (Georgia) nk

entumwa omu Bahindi. Omu rugyendo rwe arikuzayo akashanga baingi abaabaire bari omu meeri bari aba Moravia. Akakwatwaho munonga ahabw'obucureezi bwabo, obusingye, hamwe n'obumanzi omu mbeera zoon. N'obu araabe yaakozire munonga kandi akeeyangisa buzima emirimo ye omuri Georgia ekafa busha. Akagaruka Bungyereza naarira ati, “Nkaza Amerika kuhindura Abahindi kwonka shi! N'oha orampindure?”

Ku yaagarukire London akabugana aba Moravia ogundi murundi. Petero Boehler niwe yaamworekire omuhanda gw'okujunwa. Omu mazima akazaarwa obwa kabiri ekyacwire entegye omurumuna, Charles, owaarebekire aine ekiniga owaabaire atarikubaasa kwetegyereza oku omuntu w'omwoyo nka John yaakubaasa kugira ngu omu kubanza akaba atari gye na Ruhanga. Kwonka, tikiratwairwa obwire bwingi Charles, nawe, yaajunwa ahabw'embabazi.

Wesili hati akatandika kubuurira Engiri omuri ebyo bituuti omuri London ebi omu kubanza yaabaire aikirizibwamu; kwonka tikiratwairwa obwire buraingwa baamwangira. Omu bwire obu nibwo munywani we owa ira, George Whitefield, yaamushagikire ahabw'okuba akaraarika John okwija kumuhwera okubuurira omu bishaayi ahu enkumi n'enkumi baabaire nibahurira Ekigambo. Okubanza Wesili akaba atarikubaasa kukiikiriza ngu ashemereire kubuurira aheeru hatari omu kyombeko, kwonka ku yaareebire obwingi bw'abantu hamwe n'okukora kw'Engiri omu maani g'Omwoyo akatandika kubuurira n'omutima gwe gwona omu muringo ogwo.

Omu bwire butari bwa hare omurimo gukaba mwingi okuhitsya obu yaatandikire kwohereza abashomi baingi aba buriijo b'abashaija kubuurira Ekigambo. Eki kikenda kushushana na Pentekoote obu Omwoyo yaimukize abaishaija baine amaani kubuurira n'okwegyesa Ekigambo haihi obwire kusheesha.

Hakabaho okuhakanisa kw'amaani omurimo gwe kwonka Ruhanga akaba ari nawe. Emirimo y'Omwoyo ekeeyoreka n'amaani kandi emirundi mingi omwoyo gw'okwecwera orubanja gukaba gukwata abantu gubamaramu amaani kandi bakaba bagwa ahansi nibarira n'enaku nyingi mononga ahabw'ebibi byabo.

Wesili akaba ari omushaija w'amaani omu muringo ogutari gw'obutoosha. Naayegambaho ngu akaba atarikubaasa kwijuka obu yaarafukire omu mwoyo n'obu zaakuba edakiika ikumi na itaano okwiha azaarwa. Akaba abyama obutarenzya eshaaha mukaaga omu izooba; aimukira omu bwire kutandika kubuurira shaaha ikumi n'emwe buriizooba omu buheereza bwe; abuurira emirundi erikuhika ena omu izooba rimwe n'ahabw'ekyo omu mwaka otwariire hamwe akaba abuurira amashomo agari ahaiguru ya 800.

Akagyenda engyendo ezirikuhitsya zaamailo enkumi n'enkumi nk'ababuurizi be oku baakozire abaabaire bagyendera aha mbaraasi nibeetooroora ebyanga nibatwara Engiri haihi na hare. Omu mazima Wesili akaba agyenda mailo 4500 buri mwaka naagyendera aha mbaraasi.

Akaba ari omwikiriza omu maani ga Ruhanga kandi akaba ahabw'abantu abarwaire n'okwikiriza kwingi kandi ebyabaire birugamu bitangaaza.

Enteerane ze nyingi zikaba zibamu okweyoreka kw'ebiconco by'Omwoyo.

Wesili akaba atarikushagika ekibiina ky'ediini. Abu yaabaire akora nabo bakaba baine “Ekibiina ky'Abeteeraine” abaabaire bari, “ekibiina ky'abantu abaine entwaza, kandi nibasherura amaani g'okutiina Ruhanga, beeteeraine kugira ngu bashabire hamwe, kutunga Ekigambo ky'okwezirikisa, hamwe n'okureebererana omuri rukundo, kugira ngu bahwerane okurwanirira okujunwa kwabo.” Ekyabaire nikiyetengwa ahari abo abarikutaahamu kikaba kiri ngu bakaba bashemereire kuba abo, “abaabaire baine ekyetengo ky'okuhunga ekiniga ekyabaire nikiyenda kwija, kandi n'okujunwa kuruga omu bibi byabo.” Obwire ku bwagumiizemu bakataho ebiragiro bigumire bya buri omwe kukoresa omu kutegyeka engyesho ze ahabw'oburungi bw'emwoyo yaabo. Wesili akeetegyereza ngu ahanyima y'okufa kwe abakuratsi be bakaba nibabaasa kwekoramu ekibiina ky'ediini kandi Omwoyo wa Ruhanga abarugyemu batsigare omu ntwaza efiire. Hariho obu yaagira ngu akaba atarikutiina ngu eiziina Metsodisiti rikaba niriza kweba omu nsi kureka ngu Omwoyo akaba naabaasa kubatsigaho.

Omu biro by'amagara ge akaabaire yaatungire eitungo ringi munonga; kwonka tarakikozire. Eki yaabaire akunda kugamba aha kwatiraine n'esente kikaba kiri kiti, “Tunga zoon ezi orikubaasa, biika zoon ezi

orikubaasa, kandi ogabe zoonza ezi orikubaasa.” Kikaaba eky'okutangaaza ahari Wesili ku yaakugaruka akareeba ekigombe ky'ediini ekiine eziina Metsodisiti ebiro ebi. N'abatungi - abatungi munonga. Kwonka amagara n'amaani ga Wesili nigababuramu.

Kishemereire nabwo kugambwa ku Wesili yaabaire atakeetengahoga kwombeka omurimo ayegamiire ekigombe ky'ediini nari okwecwamu ebibiina. N'obu araabe yaabaire ari owa Arminia omu bi arikwikiriza, akaba atarikwenda kwetaanuura ahari bagyenzi be ahabw'enyegyesa. Akaba ari omwegi murungi wa Yakobo; akegamiza amagara ge agatahwaho aha kwikiriza n'emirimo, nari okutuura amagara, kutari kufa kwakiira enyegyesa nari enyegyesa erikugambwa.

John Wesili akafa aine emyaka 88 ahanyima y'okuheereza Ruhanga kukira oku abashaija bakye baakwehanga nangwa n'okuteekateeka ngu nibabaasa kukora.

OKURAMUSYA

Okushuuruurwa 3:7, “Handiikira maraika w'ekalisa y'omuri Filadelufia oti: Ebi nibyo bigambo by'Ogwo orikwera, Ow'amazima, Oine ekishumuruza kya Daudi, Oigura hatagire owaakinga, kandi okinga hatagire, owaigura.”

Oo, ebigambo ebyo ka ni birungi. Okuhurirwa kwabyo ka n'okw'ekitiinisa. Ka nikireeta okushemererwa waateekateeka ku ebyo bitiinisa byona birikubaasa kuba eby'omuntu omwe. N'oha owaakwehanga aha kwegambaho ebintu nk'ebyo atari Yesu Kristo, Mukama w'Ekitiinisa? Niinyikiriza ngu ekishumuruza eky'okuvunuura amakuru gonyini ga buri kimwe aha bigambo ebyo ebirungi munonga ebirukushoborora nikishangwa omu mushororongo gwa mwenda, “Mbwenu reeba, Naakuha ab'omuri sinagogi ya Sitaane, abeeyeta Abayudaaya, haza batari bo, nibabeiha; Ndyabagyema baije bainame omu maisho gaawe, babone kumanya ku Naakukunzire.” Ningamba ngu omushororongo ogu nikyo kishumuruza ahabw'okuba nigukwata aha Bayudaaya abatuura nibeeyeta abaana ba Ruhanga batarikwikiriza ku hariho abandi boona. Bakabamba kandi baita Mukama Yesu Kristo. Ekikorwa kyabo eki ekibi munonga kikareetera eshagama yaabo kubatukurira kumara emyaka amagana n'amagana. Ebi byona bikababaho ahabw'okuba bakanga Yesu nka Mesia waabo, Eki Yaabaire ari buzima. Aharibo akaba atari

Ogwo Orikwija, nari Omwana wa Daudi; aharibo Akaba ari Bezebuli, nari ogwo otahikiire oshemereire kuhwerekyerera. Kwonka tikwo kiri. Omu mazima Akaba ari Emanueli, Ruhanga oyeyorekire omu mubiri. Buzima, ni Mesia. Omu mazima, Akaba ari omu bwijwire nk'oku Arikweyoreka hati. Reeba ngugwo, YESU OTAHINDUKA - Yesu Kristo tahinduka; oku abaire ari nyomwabazyo n'erizooba nikwo ari, kandi nikwo ariguma ebiro byona. Ogwo Orikwera ori ahagati y'ebikondo by'etabaaza niwe Yesu Ogwo otahinduka owaagyendagyzire aha nkungu y'enyanya ya Galilaaya, Owaatambiire abarwaire, Owaazoire abafu, kandi Ogwo n'obu haraabe haabaireho obuhame abutarikubaasa kuhakanisibwa akabambwa kandi yaitwa. Kwonka Akazooka, kandi ashutami aha rubaju rwa buryo orw'Ow'ekitiinisa omu iguru.

Abayudaaya Tibaramwetsire orikwera obwo. Tibarikumweta orikwera na hati. Kwonka Niwe OGWO ORIKWERA. Zaaburi 16:10; “Ahakuba Toritsiga magara Gangye kuzimu, n'obu kwakuba okureka ORIKWERA Waawe kujunda.”

Bakeesherurira okuhikiirira kwabo okurikuruga omu biragiro kwonka baaremwa kubi munonga, ahabw'okuba tihaine muntu n'omwe orihikiirizibwa ahabw'ebiragiro. Ahabw'ebiragiro tihaine muntu n'omwe orihindurwa orikwera. Okuhikiirira n'okwa Mukama. 1 Abakorinso 1:30, “Kandi AHABWE muri omuri Kristo Yesu, Ou Ruhanga yaahindwire obwengye bwaitu, n'okuhikiirira, n'okwera, n'obucunguzi.” 2 Abakorinso 5:21 b, “Ngu Omuriwe tuhindukye okuhikiirira kwa Ruhanga.” Akaba ari Kristo nari kuhwerekyerera, kandi bakahwerekyerera ahabw'okuba Bakamwanga.

Kandi abantu ab'omu busingye obwo nangwa nk'ab'ebiro ebi bakaba nibakora egyo nshobi. Nk'oku Abayudaaya baahungire omu ntwaaza y'endamyanya ya sinagogi, nikwo n'omu Busingye bwa Filadelufia baabaire nibahungira omu kanisa. Okwegaita aha kanisa tikyo kikuru. Amagara tigari omu kanisa. Amagara gari omuri Kristo. “Kandi oku nikwo kuhamya okwo, ngu Ruhanga akatuha amagara agatahwaho, kandi amagara ago gari omu Mwana We. Omuntu oine ogwo Mwana niwe aine amagara; otaine Mwana wa Ruhanga taine magara.” Omwoyo niwe ohindura omuntu orikwera. N'Omwoyo w'oburikwera owaazoire Yesu okuruga omu bafu orikututuuramu kandi akatuhindura abarikwera n'oburikwera Bwe.

Ngugwo aho Ayemereire, OGWO ORIKWERA. Kandi turyayemerera Nawe tujwaire okuhikiirira Kwe, turi abarikwera n'oburikwera Bwe.

Hati obusingye obu n'obusingye bwa mukaaga. Omu maisho ga Ruhanga, obwire buri haihi kuhwayo. Ari haihi kugaruka.

Obwire butari bwa hare yaaba Naija eiraka nirija kugira riti, “Osiisikaire agume ari osiisikaire; ohikiirire agume akore eby'okuhikiirira; orikwera agume ari orikwera.” Okushuuruurwa 22:11 b.

Oo, nshemereirwe munonga ahabw'okuba oburikwera bwangye ti bwangye ahabwangye. Nshemereirwe

ahabw'okuba ndi omuri Kristo, kandi Ebimukozire byona ebirikutangaaza by'okuhikiirira nibimbarirwa, eego mbihairwe. Ruhanga asiimwe ebiro n'ebiro!

“Ebi nibyo bigambo by'Ogwo ow'amazima.” Hati ekigambo eki, “ow'amazima,” n'ekigambo ekirikutangaaza. Tikirikumanyisa amazima omu buryo bw'okutashushana n'ebishuba. Nikyoreka Okumanya Okuhikire aha kuteekateeka ekintu waagyerageranisa n'Okumanyaho Kakye. Eky'okureeberaho nitwijuka ku Yesu yaagambire omuri Yohaana 6:32 ati, “Musa tiwe yaabahaire omugaati ogwarugire omu iguru; kureka Tata niwe abaha omugaati gw'amazima oguruga omu iguru.” Yohaana 15:1, “Nyowe ndi omuzaabibu gw'amazima.” Abaheburaayo 9:24, “Ahakuba Kristo tarataahire mu mwanya ogurikwera ogwakozirwe abantu, ogurikushushanisibwa nk'ogwo ogw'amazima, kureka akataaha omu iguru buzima ngu ayeyorekye hati omu maisho ga Ruhanga ahabwaitu.” 1 Yohaana 2:8, “Ahakuba omwirima niguhwaho, kandi n'omushana ogw'amazima gwajwire.”

Obu ekigambo eki, buzima, kyoreka Okumanya Okuhikire waagyerageranisa n'ekiteekateeko ky'Okumanyaho Kakye nk'oku kirikushoboororwa omu mishororongo egi, hati nitubaasa kwetegyereza okukira oku turetegyereze ekintu ekirikyo waakigyerageranisa n'ekintu ekirikushushanisa, kandi n'ekintu ekiriho waakigyerageranisa n'ekicuucu. Twara eky'okureeberaho hati ky'emaanu okuruga omu iguru. Ruhanga akoohera eby'okurya bya baamaraika okuruga omu iguru ahabw'Abaisraeli. Kwonka omugaati ogwo gukaba gutarikubaasa kuhaazya. Gukaba guri murungi ahabw'eizooba rimwe ryonka. Abaabaire bagurya bakaba bagaruka bagira enjara eizooba eryabaire rikurataho. Ku gwabaire gutsigara gukaba gusiisikara. Kwonka Yesu niwe mugaati gw'AMAZIMA ogwarugire omu iguru, ugu emaanu yaabaire neeshushanisa. Kandi omuntu weena ku arikurya aha MUGAATI ogwo ogwarugire omu iguru tarigira njara bundi. Tarikwetenga kugaruka kurya ogundi murundi. Ku yaabaire aryaho, akaba atunga amagara agatahwaho. Hanu hakaba hariho EKIRIKYO buzima. Tihakiriho kyetengo ky'ekicuucu bundi. Tihakiriho kyetengo ky'okujunwa kakye. Hanu hariho kujunwa KWONA. Nk'oku Yesu atari ekicweka kya Ruhanga; NI Ruhanga.

Tihariho n'omwe owaakubaasize kuhakana ku Abaisraeli baabaire baine omushana. Nibo bantu bonka abaabaire baine omushana nk'eihanga. Kikaba kiri nk'obu Misri yaabaire erimu omwirima ugu omuntu yaabaire naabaasa kukwataho. Kwonka omu maka g'Abaisraeli hakaba harimu omushana. Kwonka hati omushana gw'amazima gwizire. Yesu niwe mushana gw'ensi. Musa na baanabi bakareeta omushana omu buryo bw'Ebyahandiikirwe ebirikukwata ahari Mesia. N'ahabw'ekyo Abaisraeli bakaba baine omushana. Kwonka hati Okuhikiirizibwa kw'omushana kwizire, kandi ekyabaire kitari kindi kureka Ekigambo ekirikwaka kakye hati kyorekire Okumurinkana kwa Ruhanga okurikweyoreka omu bantu Be. Nk'oku enyomyo y'omuriro yaabaire emurika nyekiro, kandi ekyo kikaba kiri kirungi, hati omushana n'amagara bikeeyorekyera omu Bwaruhanga bwona obureeberwa omu mubiri.

Abaisraeli bakaba batwara enyana y'eruutsi kahogo bagitambira aha itambiro ahabw'okusaasirwa ebibi. Kumara omwaka ebibi by'osingirwe orubanja bikaba bishwekwa. Kwonka ekyeshweko ekyo kikaba kitarikubaasa kwihaho ekyetengo ky'okukora ekibi. Kikaba kitari kitambo ekihikiriire. Kikaba kiri ekicuucu okuhitsya obu ekirikyo kyaizire. N'ahabw'ekyo buri mwaka omuntu akaba atamba ekitambo kandi buri mwaka agaruka ahabw'okuba akaba aguma aine ekyetengo ky'okukora ekibi. Amagara g'enyamaishwa gakaba garihiirira ebibi bye, kwonka ahabw'okuba yaabaire eri eshagama y'enyamaishwa eyaabaire esheesheka kandi gari amagara g'enyamaishwa agaabaire gaaheebwa gakaba gatarikubaasa kugaruka aha muntu. Ku gaakugarukire, nabwo tigaine ki gaakugasire. Kwonka Kristo eky'okurihiirira ekihikiriire ku yaahairwe, eshagama Ye ekasheesheka, reero amagara agaabaire gari omuri Kristo gaija aha musiisi oyeteisize kandi ago magara ahabw'okuba amagara agahikiriire ga Kristo, gataine kibi kandi agarikwera, obwo osingirwe orubanja akaba abohoororwa ahakuba akaba atagira kyetengo ky'okukora ekibi. Amagara ga Yesu gakaba gaizire ahariwe. Ekyo nikyo kirikumanyisa omu Barooma 8:2, “Ekiragiro ky'Omwoyo gw'amagara agari omuri Kristo Yesu kikankomoorora kutategyekwa kiragiro eky'ekibi n'okufa.”

Kwonka Abayudaaya okwo enyima omu bwire bwa Yesu tibarenzire kwikiriza ekitambo ekyo. Eshagama y'enimi n'embuzi teine eki yaahikiriize. Rimwe niyo yaabaire eri enkora etairweho Ruhanga. Kwonka hati Kristo akaheza kureebeka omu mubiri, kandi ahabw'okusheesheka kw'eshagama Ye aihireho ekibi kandi ahabw'okwo kwehayo Kwe atuhindwire abahikiriire. Abayudaaya ekyo bakaba batarikubaasa kukiikiriza. Kwonka bikaba bita ahari obwo Busingye bwa Filadelufia, kandi, eego, n'obusingye obundi, nabwo? Buzima bakaikiriza amazima aga agari omuri Kristo? Ngaaha sebo. N'obu Luteeri araabe yaareetsire amazima g'okwihwaho orubanja, Ekanisa y'Ekirooma, hamwe n'erikugishusha eya burugwa-izooba, Ekanisa ya Orthodox, nabwo zikaramatira aha mirimo. Hati emirimo ni mirungi, kwonka terikukujuna. Terikukuhindura ohikiriire. Ni Kristo nari n'okuhwerekyerera. Kandi nangwa ti Kristo HAMWE n'emirimo. Ni Kristo Wenka. Obusingye obu bukatandika emyaka y'enyegyesa y'ab'Arminia etarikwikiririza omuri Kristo nk'ORIHU W'AMAZIMA. Enyegyesa ya Arminia terikweshongora eti, “Tihariho ekindi kureka egyo Shagama,” ahakuba eyeshongora eti, “Tihariho ekindi kureka Eshagama HAMWE n'engyesho zangye.” Hati niinyikiririza omu ngyesho nungi. Ku oraabe ojunirwe noiya kukora eby'okuhikiirira. Ekyo twaherize kuyega. Kwonka reka nkugambire hati, okujunwa TIKURI Yesu na YONGYERAHU. Ni Yesu WENKA. OKUJUNWA N'OKWA MUKAMA. Okuruga aha kutandika okuhika aha muheru kwona ni RUHANGA. Reka amagara Ge gabe omuriinye. Reka ebe eshagama Ye eyanshemeza. Reka abe Omwoyo We owajura omuriinye. Reka Ekigambo Kye kube omu omutima n'akanwa kangye. Reka emihiririzi Ye ebe niyo yankiza. Reka abe Yesu, kandi Yesu Wenka. Atari ahabw'emirimo y'okuhikiirira ei nkozire. Ngaaha sebo. Kristo niwe magara gangye.

Amiina.

Niinyehurira ndi nk'orikubaasa kugumizamu kandi nkagumizamu omu mazima aga, kwonka naaza kwongyera kubaha ekiteekateeko kimwe. Kikwatsire ahari ekyo kyeshongoro kirungi eki A. B. Simpson yaahandiikire.

“Rimwe gukaba guri omugisha,

Hati ni Mukama.

Rimwe kukaba kuri okwehuriramu,

Hati n'Ekigambo Kye.

Rimwe Ekiconco Kye nikyo naabaire niinyenda,

Hati n'Omuhu waakyo.

Rimwe nkasherura okutambirwa,

Hati ni We Wenka.

Byona Omuri byona ebiro n'ebiro,

Ndyayeshongora Yesu.

Byona omuri Yesu,

Kandi Yesu niwe Byona.“

Tihariho ekindi kintu omu magara aga, n'obu kyakuba nikihaazya kita, n'obu kyakuba kirungi kandi n'obu kyakuba kiboneire kita, kwonka noija kushanga okuhikiirira kwona omuri Kristo. Ahu Atari buri kintu kihinduka busha.

“Ogwo Oine ekishumuruzo kya Daudi.” Ebigambo birungi ebi nibukurata kandi nibiruga omu bigambo ebirikubanza, “Ogwo ow'amazima.” - Kristo Okumanya Okuhikire, waakugyerageranisa n'Okumanyaho Kakyee. Nkiki hanu. Musa akaba ari nabi wa Ruhanga, kwonka Yesu (orikushushana na Musa) akaba ari OGWO Nabi wa Ruhanga. Daudi (omuntu ori nk'oku omutima gwa Ruhanga gurikwenda) akaba ari omugabe wa Israeli, kwonka Yesu niwe Daudi Orikukiraho, Omugabe w'Abagabe kandi Omukama w'Abakama, Ruhanga kandi Ruhanga buzima. Hati Daudi akazaarwa omu ruganda rwa Yuda orwabaire rutarugwamu banyamurwa, baitu akarya emigaati y'okumurikwa eyaabaire ebiikirwa abanyamurwa. Akaba ari omurwani mukuru orikusingura abazigu, naahamya abantu; nk'omugabe akashutama aha kitebe ky'obukama. Akaba ari nabi. Akaba ari ekirikushushanisa kirungi munonga kya Kristo. Hati nikigamba omuri Isaaya 22:22 kiti, “Ekishumuruzo ky'enju ya Daudi Ndyakita aha ibega Rye. Niwe Ariigura, hatagire waakinga, kandi Arikinga, hatagire weigura.” Omwoyo naakoresa eky'okureberaho eki eky'Endagaano eya Ira ekirikukwata ahari Mukama Yesu Kristo hamwe n'obuheereza Bwe omu kanisa. Eky'ekishumuruzo kya Daudi kyabaire nikimanyisa omu bwire obwo kikaba kiri ekicuucu, kwonka ekirikuhikiirira hati omuri Yesu ayemereire ahagati y'ebikondo by'etabaaza. Nikikwata ahari Mukama waitu AHANYIMA y'okuzooka Kwe atari obu Yaabaire ari omu rugyendo Rwe orw'omu nsi. Kwonka ekishumuruzo eki nikimanyisa ki? Eky'okugarukamu kiri omu MWANYA ogu ekishumuruzo kirimu. TIKIRI omu ngaro Ze. Tikijwairwe omu bitsya Bye. Tikitairwe omu ngaro z'abandi bantu, kitari kityo omushororongo tigwakubaire nigugamba ngu WE WENKA NIWE ORIKUKORESA EKYO KISHUMURUZO - AHAKUBA NIWE WENKA OIGURA KANDI AKAKINGA, TIHARIHO MUNTU oine obwo bushoboorozi kureka Yesu Wenka. Tikwo kiri? Kwonka ekishumuruzo kiri nkahi? KIRI AHA IBEGA RYE. Kwonka EIBEGA riine kakwate ki nakyo? Shoma Isaaya 9:6, “Obutegeyeki buryaba aha mabega Ge.” Kwonka eki nikimanyisa ki? Eky'okugarukamu nikyo eki. Ebigambo, “obutegeyeki buri aha mabega Ge” nibiruga omu migyenzo y'obugyenye bw'okugaitwa ya Burugwa-izooba. Omugore ku aheza kuheebwa kishwera ayeihaho akatimba ke k'aha mutwe reero akata aha mabega ga kishwera, kirikumanyisa ngu tari ahansi y'obutegeyeki bwa kishwera kwonka - kureka ngu n'obugabe bwe yaabuha iba - ku iba niwe mutwe - kandi nabwo ku iba niwe aine obujunaanizibwa n'okureberera kandi ngu IBA WENKA KANDI WE WENKA - TIHARIHO ONDIJO WEENA - TIHARIHO ONDIJO MUNTU - TIHARIHO OBUSHOBOOROZI OBUNDI - OBUMWINEHO OBUGABE N'OBUNJUNANIZIBWA. Kandi ekyo, abarikukundwa, nikyo KISHUMURUZO kya Daudi. Ruhanga ahabw'okuba ow'Obushoboorozi bwona, Akamanya ira buzima abariba omu mugore We batakabaireho ahabw'okucwamu kw'Obwaruhanga. Ruhanga akatoorana omugore. Omugore tiwe yaatooraine Ruhanga. Ruhanga niwe yaamwetsire. Omugore taraizire ahabwe wenka. Akamufeera. Yaamwozya n'eshagama Ye. Yaamushashurira omuhendo. Omugore n'Owe kandi Owe wenka. Omugore ayeheereireyo kimwe Ahariwe kandi Kristo naikiriza obwo bujunaanizibwa. Niwe mutwe gw'omugore, ahakuba Kristo niwe mutwe gw'ekanisa Ye. Nk'oku Saara yaabaire ayeta Abrahamu, Mukama, nikwo n'omugore ashemererwa ahabw'okuba Kristo ari Mukama we. Kristo agamba kandi omugore amworobera ahabw'okuba okwo nikwo kushemererwa kw'omugore.

Kwonka abantu baikiriza amazima aga? Abantu bahaire Kristo ekitiinisa We wenka oine obushoboorozi bwona bw'okwemariirira aha kanisa Ye? Ningamba nti, “NGAAHA.” Ahakuba omuri buri busingye ekanisa etaaha neetegyekwa abakuru b'ediini abarikukirakirana omu bitiinisa - obunyamurwa - okuhungurirana kw'entumwa -

birikulinga orwigi rw'okusaasira n'embabazi ahari abo abu byasiima, kandi omu mwanya gw'okugira rukundo n'obujunaanizibwa aha kanisa abakuru b'ediini bakwatsire ekanisa ahabw'omururu gw'esente baagihwerekyereza. Abakuru b'ediini abatendekirwe bakaba batuura omu kujarama obwo ekanisa y'abooro erikujumwa. Kandi tihaine obusingye na bumwe obwakoziye okundi. Buri busingye bukeekomera aha kibiina ky'ediini kandi gavumenti bwagikwatsa abantu n'ekanisa bwagihayo ahari egyo gavumenti. Abantu ku baabaire beehanga kwimuka, bakaba bazibirwa kubi munonga nari babingwa. Buri kigombe ky'ediini kiine ogwo mwoyo. Buri kigombe ky'ediini kirahira ku kiine ekishumuruzo ky'okutegyeka ekanisa. Buri kigombe ky'ediini kyegamba ku nikiigura orwo rwiigi. Kwonka ago tigari mazima. Ni Yesu kandi Yesu, wenka. Ata baamemba omuri ogwo Mubiri. Abaha obuheereza bwabo. Aha ekanisa ebiconco ngu ebikorese. Agifaho kandi agyebembera. Ekanisa N'eye kyarimwe kandi Taine ndiijo kureka yo yonka.

Obusingye obu bw'ekanisa obu tutwiremu ka buri hare munonga n'amazima. Kwonka obwire butari bwa hare abantu aba abu na hati barikwetwaramu nk'abagambirizi b'ekanisa nibaija kwimukira omu mugyendo gw'obumwe bw'amakanisa okuta antikristo ohuriire aha mutwe gw'ekibiina kyabo ky'ediini ekirikwimuura Mukama kandi nitwija Kumushanga (Kristo) aheeru y'ekanisa naagira ati, "Reeba, Nyemereire aha rwiigi, nindukongoota niinyiguzi; omuntu weena, ku araahurire eiraka Ryangye Yaanyigurira, Niinyija kutaaha omu nju ye, Ndyeye nawe, nawe arye Naanye." Okushuuruurwa 3:20.

Kwonka reka ngambe eki. Mukama waitu tasingwirwe. Abantu bagira ngu baigura orwigi orurikuza owa Ruhanga hamwe n'okurukinga, kwonka n'ababeihi. Boona abu Ishe Yaamuhaire baryaija Ahariwe; kandi orikwija Ahariwe tarimubinga na kakye; tihariho N'OMWE Orimuburaho. Yohaana 6:37-39. Kandi ogwo otoorainwe omu mubiri gwa Kristo ow'aha muheru ku aritaahamu, obunaku obwo Mukama waitu aryaija.

Ekishumuruzo kya Daudi. Daudi akaba atari omugabe wa Israeli - Israeli yoona? Na Yesu t'Omwana wa Daudi nk'oku kiri ngu Aryashutama aha kitebe ky'obukama kya Daudi omu kutegyeka kw'emyaka rukumi kandi ategyekye obuhunguzi Bwe? Buzima. N'ahabw'ekyo ekishumuruzo kya Daudi nikyoreka ku ari Yesu Orireetaho obutegyeki bw'emyaka rukumi. Ogwo Oine ebishumuruzo bya rufu n'okuzimu aryazoora Abe kugira ngu babaase kukwatanisa Nawe omu butegyeki Bwe obw'okuhikiirira omu nsi.

Ka ni kirungi Mukama waitu kugira eby'okugarukamu byona. Buzima Omuriwe okuraganisa kwona kwa Ruhanga nimwo kuhikiirira. Buzima ahabw'okuba Omuriwe turi abahunguzi ahari ekyo eki Yaatushashuriire.

Eego, ngugwo aho Ayemereire, Mukama w'Ekitiinisana. Omu kubanza nka Isheboona, Akaba ayetooroirwe baamaraika, baamaraika bakuru, baakerubi, baaserafi, n'eihe ryona ery'omu iguru, nirigambira ahaiguru riti, "Mukama Ruhanga ow'Amaha n'Orikwera, n'Orikwera, n'Orikwera." Okwo nikwo oburikwera Bwe bwabaire buri hatariho omuntu weena owaakubaasize Kumwirira haihi. Kwonka hati Nitumureeba omu kanisa naabagana naitwe oburikwera Bwe, okuhitsya obu Omuriwe tuhindikire okuhikiirira kwenyini kwa Ruhanga. Eego, ngugwo aho Ayemereire, "Yesu, Okuhikiirira kwa Byona," - Eirebe ry'omu Mpita, Enyonyoozi y'omu Kasheeshe Erikumurinkana, Orikukirayo Oburungi omu Bantu Kakumi, Alufa na Omega, Ekitsitsa kya Daudi, Isheboona, Omwana n'Omwoyo Orikwera - ogwo Byona omuri Byona. Isaaya 9:6, "Ahabw'okuba Omwana atuzaaariirwe, Omwana w'omwojo atuhairwe, obutegyeki buryaba aha mabega Ge, n'Eiziina Rye aryayetwa Omuhanuuzi, Orikutangaaza, Ruhanga Ow'obushoboorozi, Tataitwe Otahwaho, Mukama w'Obusingye." Omuriwe nimwo okuhikiirira okuhikire kuri. N'obu rimwe Tutaramuhaire kitiinisana, hati Nitumukunda n'okushemererwa okutarikubaasa kushoboororwa okwine ekitiinisana kingi. Ayemereire ahagati y'ekanisa, kandi nitwija kweshongora eby'Okumuhimbisa, ahabw'okuba We Omusinguzi Mukuru niwe mutwe gw'ekanisa kandi niyo mugore We. Akagura ogwo mugore. Omugore n'etitungo Rye. Omugore n'owa Kristo kandi Kristo wenka kandi na Kristo naamufaho. Kristo n'omugabe waitu kandi turi obukama Bwe, eitungo Rye eritahwaho.

Hati noiya kwijuka ngu aha kutandika kw'omushororongu gwa 7, naagambire ku omushororongu gwa 9 niguza kutuhwera kuyetegyereza. Nyine amatsiko ngu mureebire eki manyiise. Yesu akeeyoreka nk'Ogwo orikwera, ow'amazima, (nari ohikire wenka) Ogwo oine ekishumuruzo kya Daudi, Ogwo Orikwigura kandi akakinga. Kandi ekyo buzima kihikire. Ebyo bigambo Nibimushoboororaho kurungi munonga. Kwonka Abayudaaya omu biro Bye Bakamwanga na kyona eki Yaabaire ari. Bakanga Omujuni waabo na byona ebi Yaabaire naamanyisa aharibo. Kandi n'abo abarikweyeta Abakristaayo bakozire ekintu ekyo kyonyini. Bakoreire kimwe eki Abayudaaya baakozire. Abayudaaya Bakamubamba reero baayehindikana abaikiriza b'amazima. Orikweyeta Omukristaayo agarukire Kumubamba busya kandi yaayehindikana ekanisa y'amazima kugihwerekyereza. Kwonka Ruhanga n'ow'amazima, kandi Ogwo Orikukira boona Aryagaruka, kandi ku Arigaruka Aryayoreka Omutegyeki ogwo omwe wenka Ou ari. Kandi ku Ariba Naayeyoreka ensi, n'ensi yoona erikwinama aha bigyere Bye, omu bunaku obwo ensi yoona eryainama aha bigyere by'abarikwera, erikuhanya ku baabaire bahikire omu kwemerera Nawe. Ruhanga ahimbisibwe ebiro byona!

OBUSINGYE BW'ORWIGI ORWIGWIRE

Okushuuruurwa 3:8, "Nimmanya emirimo yaawe. Reeba, Ntaire omu maisho gaawe orwigi orwigwire, oru omuntu weena atarikubaasa kuinga. Nimmanya ngu oine amaani makye, kwonka (okarinda) Ekigambo Kyangye, tiwaayehakana Iziina Ryangye."

Ebigambo by'okubanza by'omushororongu ogu, "Nimmanya emirimo yaawe," nibishoboororwa kurungi omu

byakurataho omu mushororongo, ahakuba emirimo yaabo ekaba eine akakwate “n'orwigi orwigwire,” “amaani makye,” “Ekigambo kandi n'Eziina.”

Okugira ngu twetegyereze amakuru maingi agari omuri “reeba, Ntaire omu maisho gaawe orwigi orwigwire, oru omuntu weena atarikubaasa kukinga,” nituragiirwa hati kugaruka kwijuka ebyagambirwe ahari buri busingye kutaaha omu bundi busingye. Hariho bumwe okurengyera omu bundi, okunywengyeberera nari okuburiramu, kutari okuhwaho kw'ahonaaho hamwe n'okutandikiraho. Obusingye obu okukira munonga nibuza kurengyera omu busingye oburaakurateho. Kandi tikugira ngu obusingye obu nibutaaha omu busingye bw'aha muheru kwonka, kureka obusingye bw'aha muheru omu miringo mingi n'okugumizamu kw'obusingye bwa mukaaga. Obusingye bwa mushanju (obusingye bugufu munonga) nibweshoroorezamu ahabw'omurimo gwa juba, obubi bwona obwa buri busingye, hamwe n'amazima goona ga Pentekoote. Obusingye bwa Filadelufia bwaba buri haihi kuhwaho, Obusingye bwa Laodikea nibutaahamu juba juba, burikureeta enkyenzi n'engaano aha kushaaruurwa, “Mubanze mutooranemu enkyenzi, muzibohe enganda zookibwe, reero oburo mubuhunikye omu bitara Byangye.” Matayo 13:30. Ijuka, nyaabura 'we, ku Obusingye bwa Saadi bwatandikire okuhunduuza okurikuteekwa kugumizamu okuhitsya obu enjuma eyaabyairwe ahari Pentekoote eraarabe omu matembezo goona g'okubyarwa, kwitirirwa amaizi, kuheebwa ebiriisa, n'ebindi, okuhitsya obu eraagarukye kuba embibo eyaabandize. Eki kyaba nikigyenda omu maisho, enkyenzi ezaabibirwe nizijja kugumizamu omu kukura kwazo kandi nazo zishaaruurwe. Eki buzima nikyo turikureeba nikibaho. Ku waakubaasa kuteekateeka kwonka aha bunaku bw'okubyarwa n'okushaaruuriramu eby'okurya, noobaasa kutunga ekishushani kirungi ky'eki. Ekimera eki orikureeba nikipura n'amaani omu kyanda ahonaaho kireebeka nk'ekyaza kuba embibo. Torikubaasa kumanya buzima obu ekyanda kihinduka igyesha (autumn) - ekyanda kihenderera omu igyesha. Okwo nikwo n'obusingye buri, kandi okukira munonga obusingye obu bubiri obw'aha muheru.

Obusingye obu nibwo Yesu arikugambira ati, “Niinyija JUBA” omushororongo gwa 11. Ekyo nikituma obusingye bw'aha muheru bwaba obusingye bugufu munonga. Laodikea n'obusingye bw'omurimo gwa jubajuba. Bucwirwe bugufu.

Hati buzima twaza kumara akaire nitugamba aha RWIGI ORWIGWIRE oru hatariho muntu weena orikubaasa kurukinga. Okubanza kwa byona niinyenda kuguma aha ky'orwigi orwigwire nk'ekirikumanyisa omurimo mukuru munonga gw'abamiishani gw'obusingye obwo. Paulo akeeta okwehayo kusya kw'omurimo gw'abamiishani ahabwa Mukama orwigi orwigwire. 2 Abakorinso 2:12, “Ku naizire Troa kubuurirayo Engiri ya Kristo, naashanga Mukama anyiguriireho orwigi.” N'ahabw'ekyo nitubaasa kureeba ahabw'okugyerageranisa Ebyahandiikirwe ku orwigi oru orwigwire kyabaire nikimanyisa okujanjaara kw'Engiri kw'amaani oku ensi erareebire.

Niinyenda ngu mureebe ekintu hanu. Ruhanga akorera omuri za ishata, tikwo? N'omu busingye bwa kashatu nari shi Obusingye bwa Perugamo obu ekanisa yaashwerwa gavumenti. Ebikorwa by'Abanikolaiti bikaba byahindikire enyegyesa y'Abanikolaiti. Obusingye obwo bukaba ORWIGI ORWIGWIRE aha muzaabibu ogw'ebishuba. Ku gwaherize kushagikwa n'amaani ga gavumenti buzima gukahinduka entwaza y'ensi n'obu kiraabe ngu gukaba gwine eziina, Obukristaayo. N'ahabw'ekyo gukujanjaara nk'omuriro gw'ekyanda. Kwonka hati, obusingye bushatu omu maisho, ahanyima y'okurwana kugumire kandi kuraingwa kw'okwikiriza, hanu haija ORWIGI ORWIGWIRE aha mazima. Ekigambo kya Mukama hati kyayeyongyera kujanjaara. N'ekya buzima obusingye bwa kataano bukaba bwataireho entandikiro ahabw'enkora y'amaani egi, nk'oku obusingye obwo bwatuhare okujumbura amahanga, amahanga kutegyeka agandi, okuteera ebitabo, n'ebindi.

Kikaba nikiza kuba kirungi kuri “orwigi orwigwire” oru rwakuratsire entwaza ya Ruhanga eya Pentekoote erikworekwa omu Baheburaayo 2:1-4, “Nikyo tushemerereire kuta omutima aha bi twahuriire, ngu tutahaba tukabirugaho. Mbweni Ekigambo ekyagambirwe baamaraika, ku kiraabe kyahamire, kandi n'okushiisha kwona n'okutahirira kwona ku biraabe byahairwe ekifubiro ekibishemereire, itwe turyakira tuta, ku turiba tuteetaire ha kujunwa okukuru okurikwingana kuti? Okujunwa okwo kukabanza kugambwa Mukama, twakuhimizibwa Abaamuhuriire; kandi na Ruhanga yaakuhama n'obumanyiso n'eb'okutangaza n'eb'amahano by'emiringo mingi n'ebiconco by'Omwoyo Orikwera, ebi Ruhanga yaagabire nk'oku Yaasiimire.” Hati nimumanya ku egi niyo ntwaza ahakuba Yesu, We wenka, nikwo yaagambire. Mako 16:15-20, “Yaabagira ati: Mugyende omu nsi zoon, mubuurire Engiri ebihangirwe byona. Oriikiriza akabatizibwa, aryajunwa; kwonka otariikiriza, aryingwa orubanja. Obumanyiso oburiguma nibureebwa omu barikwikiriza n'obu: omu Iziina Ryangye baryabinga baadaimoni, baryagamba endimi nsya; baryakwata enjoka, kandi ku baryinwa ekirikwita kyona, tikiribarwaza; baryata engaro aha barwaire, bakire. Bwanyima Mukama waitu Yesu, ku Yaaherize kugamba nabo, Yaatarwa omu iguru, yaashutama aha rubaju rwa buryo rwa Ruhanga. Nabo baashohora, baagyenda hoona hoona nibabuurira Ekigambo kya Ruhanga, Mukama waitu ari hamwe nabo naabakwatsa, kandi naahama Ekigambo ekyo n'obumanyiso obwabaire bukikomookaho. Amiina.”

Tarabagambiire kugyenda omu nsi yona kwombeka amatendekyero g'okwegyesezamu Baiburi; kandi Tarabagambiire kugaba ebitabo. Hati ebintu ebyo ni birungi, kwonka eki Yesu yaabagambiire kukora kikaba kiri OKUBUURIRA ENGIRI - kuhamira aha KIGAMBO - reero obumanyiso bukaba nibwija kukurataho. Okwanjura kw'okubanza buzima oku twine omu miringo ogu Obukama bwa Ruhanga bwabaire nibuza kubuurirwamu n'obu Yaatumu bari ikumi na babiri. Omuri Matayo 10:1-8, Akabatuma kandi yaabaragiira omu buryo obu, “Yaayeta abeegi Be ikumi na babiri, Yaabaha obushoboorozi bw'okubinga baadaimoni, n'okukiza endwara zoon n'obumuga bwona. Amaziina g'abeegi ikumi na babiri nigo aga: ow'okubanza ni Simooni orikwetwa Petero, na

Anderea omurumuna; na Yakobo mwene Zebedaaayo, na Yohaana omurumuna; Filipino na Batolomaayo; Tomasi na Matayo omuhooza; Yakobo mwene Alufaayo na Tadaayo, Simooni Omukananaayo na Yuda Iskaryota owaamureebize. Abo ikumi na babiri Yesu akabatuma, yaabaragiira ati: Mutariza omu Banyamahanga n'obu kwakuba okutaaha omuri tauni yoona ey'Abasamaria; kureka mugyende omu ntaama ezaabuzire ez'omu ruganda rw'Abaisraeli. Omu kugyenda mugyende nimugamba muti: Obukama bw'omu iguru bwiriire haihi. Mukize abarwaire, muzoore abafiire, mushemeze ababembe, mubingye baadaimoni. Mukaheerwa busha, naimwe muheere busha." Obuheereza obu obu Yaabahaire omu mazima kukaba kuri okubagana nabo obuheereza Bwe, ahabw'okuba nikigamba omuri Matayo 9:35-38 kiti, "Yesu yaagyendagyenda omuri tauni zoonza n'omu birorero byona naayegyesa omuri sinagogi zaabo, naagamba Engiri y'obukama bw'omu iguru, kandi naakiza endwara zoonza n'obumuga bwona. Ku Yaareebire emitwe y'abantu, Yaabagirira esaasi, ahakuba bakaba baburaburiirwe, bashobeirwe nk'entaama ezitaine muriisa. Nikwo kugira abeegi Be ati: Eby'okugyeshya ni bingi munonga, kwonka abagyesi ni bakye; n'ahabw'ekyo mushabe Mukama w'eigyeshya Ayoherereze abagyesi omu by'okugyeshya Bye."

Hati abantu baingi baine ekiteekateeko ngu entumwa zonka nizo zaabaire ziine obuheereza obwazihairwe Mukama waitu Yesu, n'ahabw'ekyo ku zaafiire, obuheereza obu bwahwaho. Ekyo tikwo kiri. Hanu omuri Luka 10:1-9, nitushanga ngu omu biro by'orugyendo Rwe omu nsi Akaba yaatandikire kuha Abe obuheereza bw'obushoboorozi, "Bwanyima y'ebyo Mukama waitu yaatoorana abandi makumi mushanju, yaabatuma babiri babiri, ngu Bamwebembere bagyende omuri tauni zoonza n'omu myanya yoona ei Yaabaire naayenda kuhikamu. Yaabagira ati: Eby'okugyeshya ni bingi, kwonka abagyesi ni bakye; n'ahabw'ekyo mushabe Mukama w'eigyeshya atume abagyesi omu kugyeshya Kwe. Mugyende; reeba, Nibatuma muri nk'entaama ahagati y'emishaga. Mutatwara enshaho z'empiiha, n'obu zaakuba efurebe, nari enkaito; kandi mutagira ou mwaramutsya omu muhanda. Enju yoona ei muraataahemu, mubanze mugire muti: obusingye bugume omu nju egi! Ku muraashangyemu Omwana w'obusingye, obusingye bwanyu nibwija kuguma ahariwe; kwonka ku kiraabe kitari kityo, obusingye bwanyu nibwija kubagarukira. Mugume omu nju egyo, murye kandi munywe ebi baraabagaburire; ahakuba omukozi ashemereire ebihembo bye; mutariruga omu nju mukagyenda nimuraarara omu zindi. Kandi tauni yoona ei muraataahemu, bakabaakiira, murye ebi baraabate omumaisho. Mukize abarwaire baamwo, mubagambire muti: Obukama bwa Ruhanga bubairiire haihi."

N'oha owaakubaasa kwehanga kuhakanisa obuheereza bw'amaani bwa Filipino? N'oha owaakubaasa kwehanga kuhakanisa obuheereza bw'amaani bwa Irenaeus, Martin, Kolumba, Patrick n'abandi baingi abatakaabarwa abaatungire okushukwaho kwa Ruhanga?

Eego. Omuhanda gwa Baiburi nigwo muhanda gw'amazima ogw'orwigi orwigwire. Kandi niinyenda kwongyeraho obujurizi bwangye ahari ekyo. Enshonga erikutuma naakikora n'ahabw'okuba nimbaasa kugamba nyine obwesigye eburikukwata aha bi Ruhanga wenka akozire omu magara gangye. N'ahabw'ekyo ku mwakuunyikiriza kugira eki naagambaho hanu niinyija kubagambira oku ndikumanya omu mazima ku Yesu atahinduka; oku abaire ari nyomwabazyo n'eriizooba nikwo ari, kandi nikwo ariguma ebiro byona kandi ku amaani ga Ruhanga gakiriho ahari abo abarajje kwikiriza kandi bakagaakiira.

Obu naabaire ndi omu rugyendo rwangye rw'okubuurira Engiri omuri Afrika y'omu Mashuuma, Ruhanga akaha omugisha munonga okuhitsya obu naahikire Durban omwanya gwonka ogwatandikire kushutamisa abantu gukaba guri omwanya rutaaba ogu baabaire bakoreramu emizaano y'okwiruka ogwabaire guri ogwa kabiri omu buhango omu nsi yoona. Omutwe gw'abantu gukaba nigurenga 100,000. Okwenda ngu barinde ebiragiro n'obuteeka bakaba baine kutaho engo kutaanisa enganda ezitari zimwe. Omu mwanya ogwo bakooherezamu amagana n'amagana g'abaporiisi kucureeza egyo mitwe mingi y'abantu. Abantu abo abaine enjara y'omwoyo bakaba barugire omuri zaamailo nyingi. Omugabekazi kuruga Rhodesia akaba aizire n'egaari y'omwika y'ebishengye 27 bijwire enzaarwa z'Abafirika. Bakategana kwija nibaraba omu bibira n'omu nshozi baheekire abarikukundwa baabo aha migongo yaabo kumara mailo nyingi munonga abaabaire nibeetenga obuhwezi. Eihanga ryona rikasisiimuka ahabw'eb'okutangaza ebyayorekirwe Omwoyo Orikwera.

Eihangwe rimwe ku naatandikire kuheereza, omwe aha nkumi z'ab'enyikiriza y'Abasiraamu yaija aha kituuti. Omukazi ku yaayemereire omu maisho gangye, omushaija omumiishani aha Basiraamu yaatandika kweshengyereza Mukama omu iraka ry'ahansi, "Oo, amagara g'omuntu ogwo ag'omuhendo. Oo, amagara g'omuntu ogwo ag'omuhendo." Akaba atwireyo kumara emyaka n'emyaka, kandi okurugiirira omu bujurizi bwe, akaba areebire Omusiraamu OMWE wenka naija kwakiira Yesu Kristo nk'Omujuni. Obukomooko bwabo bakaba bari Abameedi n'Abaperesi abu ebiragiro byabo bitahinduka. Bagumire okwikiririsa. Nikishusha oti "owaabaireho Omusiraamu aguma ari Omusiraamu" n'ekiragiro kyabo. Mpaho, omukazi ogwo ku yaayemereire omu maisho gangye, naatandika kugamba nawe hamwe n'ezo nkumi z'abantu zoonza kurabira omu bavunuuzi. Naagira nti, "Tikiri ngu abamiishani bakabagambira ebya YESU Owaizire kubajuna?" Kuri waareebire oku abantu bareebaine ku naagambire ekyo. Reero ku baaherize kugarukamu ngu mpikire nkagumizamu naagira nti, "Beitu abamiishani bakabashomera omu Kitabo eki" (naimutsya Baiburi yangye ahaiguru ngu bagireebe) "ku Yesu ogu yaabaire ari omutambi mukuru, kandi ku Arituura omu bantu Be omu busingye bwona okuhitsya obu Arigaruka ogundi murundi Kubeegarurira? Bakabagambira ngu ahabw'Omwoyo ogwo ori omuribo owaabaire ari omuri Yesu ku barikubaasa kukora emirimo mikuru nk'ei Yesu yaakozire? Bakabagambira ngu nimubaasa kutambirwa, nk'oku murikubaasa kujunwa? Ni bangahi omuriimwe abarikwenda kureeba Yesu naashuuma omuriitwe kandi naakora ebintu ebyo bimwe nk'ebi Yaakozire obu Yaabaire ari hanu omu nsi ira munonga?" Ekyo boona bakakyetenga.

Ekyo n'ekintu kimwe buzima eki baikirizaineho boona.

Reero naagumizamu nti, “Yesu ahabw'Omwoyo We ku yaakukora eki Yaakozire obu Yaabaire ari omu nsi nimwija kwikiriza Ekigambo Kye, kyaba kiri kityo?” Kandi ngugu hanu omukazi omusiraamu ogwo akaba ari omu maisho gangye. Omwoyo

yaatandika kukorera omuriinye.

Naagambira ogwo mukazi nti, “Hati, noomanya ku ntarikukumanya. Tindikubaasa n'okugamba orurimi rwawe.” Ekyo yaakyemera. Naagira nti, “Eky'okukutambira, noomanya ku ntarikukubaasa. Kwonka waahurira obutumwa omu ihangwe eri kandi wanyetegyereza.” Omuhindi owaabaire naamuvunuurira yaamugarukiramu ngu ayetegyereze, ahakuba akaba ashomire Endagaano Ensy.

Hati Abasiraamu nibakomooka ahari Abrahamu. Nibaikiririza omuri Ruhanga Omwe. Kwonka tibarikwikiriza ngu Yesu n'Omwana wa Ruhanga kureka Muhamadi niwe barikutwaramu kuba nabi We. Nibagamba ngu Yesu tarafiire kandi akazooka. Ekyo nibakyegyesebwa abeegyese baabo kandi nibakiikiriza.

Naagira nti, “Kwonka Yesu akafa kandi yaazooka. Akoohereza Omwoyo We kugaruka aha kanisa. Omwoyo ogwo owaabaire ari Omuriwe niwe Mwoyo omwe ori omu kanisa hati kandi Naabaasa kandi naija kukora nk'ebi Yesu yaakozire. Akagamba omuri Yohaana 5:19 ati, 'Omwana tabaasa kukora kintu kyona Ahabwe, kureka eki Areeba Ishe naakora; mumanye ngu ebi Ruhanga akora byona, n'Omwana nawe nibyo akora.' Hati mbwenu, Yesu ku yaakwija haza akanshuuruurira obusaasi bwawe nari ekikureetsire hanu - ku Yaakungambira ebyakubaireho, buzima okaikiriza ebiribaho?”

Ogwo mukazi yaagamba naarabira omu muvunuuzi we ati, “Eego, niinyikiriza.”

Naagira nti, “Kare, ninshaba ngu Akikore.”

Abo Basiraamu bakaba nibareeba bataireho omutima. Boona bakaba nibagezaho kureeba ekiraabeho.

Reero Omwoyo Orikwera yaagira ati, “Baro n'omushaija mugufu, muhango, aine ebireju ebirikwiragura by'aha munwa gw'aharuguru. Oine abaana babiri. Obaire ori owa dokita nk'ebiro bishatu ebihingwire kandi yaakukyebera. Oine ekizimba omuri nyinenda.”

Yainika omutwe gwe yaagira ati, “Ago n'amazima.”

Naamubuza nti, “Kibaire kita iwe kwija ahariinye, Omukristaayo? Ahabw'enki otagiire owa nabi waawe Muhamadi?”

Yangira ati, “Nintekateeka noobaasa kumpwera.”

Naagira nti, “Tindikubaasa kukuhwera, kwonka ku oraayakiire Yesu Kristo nk'Omujuuni waawe, Ogwo Ori hanu hati, kandi orikumanya ebyawe byona, Naija kukuhwera.”

Yaagira ati, “Niinyakiira Yesu nk'Omujuuni wangye.” Ekyo kikakikora. Akatambirwa kandi haihi Abasiraamu omutwaro bakaikiriza Kristo izooba eryo ahabw'okuba Engiri ekabuurirwa omu maani n'Ekigambo. Ruhanga takagambiraga omuntu kukora emyaka makumi ashatu haza akashaaruura busha. Akatuha orwigi orwigwire rw'Ekigambo n'amaani kandi ekyo nikyo tushemereire kukoresa. Ekyo nikyo kyahaire Paulo obuheereza bwe obukuru kandi oburimu amaani omu kukora. 1 Abakorinso 2:4, “Emigambire yangye n'obutumwa bwangye bikaba bitari bigambo by'obwengye eby'okwikiririsa abantu, kureka eby'okubooreka Omwoyo n'amaani.”

Mpurikiza hati. Ku naabaire nkiri omuri oru rugyendo ninza kutemba enyonyi ahari New Salisbury, Rhodesia, nkareeba ekibiina ky'abantu bana baine paasipoota z'Amerika. Nkabahika naababuza nti, “Muri muta? Nindeeba mwine paasipoota z'Amerika. Haine ahu murikuza?”

Omutsigazi yangarukamu ati, “Ngaaha, twena turi abamiishani hanu.”

Naagarukamu nti, “Ka ni kirungi. Muri hanu ahabwanyu nari nimukora n'ekibiina ky'ediini?”

Yangarukamu ati, “Turi Abametsodisiti. Nituruga Wilmore, Kentucky.”

Naagarukamu nti, “Yebare, haihi ni nk'ekaanyima y'owangye.”

“Okaaba ori Ow'eishe-emwe ogwo Branham ow'eruguru okwo, oriwe?”

Naagira nti, “Eego, nikwo kiri.” Ekyo kikamutambira. Akaba atarikubaasa kugamba ekindi kintu - kandi n'omuringo ogu we n'abo baishiki bashatu baareebainemu. N'ahabw'ekyo naagira nti, “Rindaho kakye mwojo 'we, nkaayenzire kugamba naimwe mwena ahari bimwe by'engyenderwaho, ahabw'okureeba twena turi Abakristaayo kandi turi hanu ahabw'ekigyendererwa kikuru. Hati nimugira ngu imwe mwena bana mumazire hanu emyaka ebiri. Nimubaasa kugamba omu Iziina rya Yesu ku murikubaasa kuta orukumu aha muntu omwe ou murikumanya ou mureetsire ahari Mukama?” Bakaba batarikubaasa kukikora.

Naagira nti, “Tindikwenda kubashaasha, baishiki 'mwe, kwonka imwe mwena mushemereire kuba muri omuka nimuhwera baanyoko kwozya eby'okuriiramu n'eby'okunyweramu. Ti murimo gwanyu kubuurira Engiri aheeru mwaba mutaijwire Omwoyo Orikwera kandi murikubuurira Engiri y'amazima omu kweyoreka kw'amaani g'Omwoyo Orikwera. Ku muraabe mutarikureeba obumanyiso obu Yesu yaagambire ngu muryareeba, n'ahabw'okuba mutarikubuurira Engiri y'amazima.”

Ka nteere orutambo orundi omu maisho reero mboorekye oku ebintu birikubaasa kuba aha murimo gw'obumiishani. Tindikugira ngu byona biri omu muringo ogu, kureka nintiina ngu ebingi munonga nikwo biri. Ku naabaire nkiri omu rugyendo oru nindambura orurembo Durban na meeya nkareeba omuntu enzaarwa y'aho aine akamanyiso omu bitsya bye kandi aine ekishushani ekirikuramibwa. Naabuza munywani wangye omugasho gw'akamanyiso ako aku yaabaire ajwaire omu bitsya nawe yaagira ngu omuntu enzaarwa ku ayakiira Obukristaayo bamutaho akamanyiso. Ekyyo buzima kikantangaaza, ahakuba hanu hakaba hariho omuntu orikweyeta Omukristaayo kandi ayekoreire ekyyo kishushani ekirikuramibwa, n'ahabw'ekyyo naabuza oku ekyyo kyakubaasika.

Yangira ati, “Nimbaasa kugamba orurimi rwe. Reka tumuhikyeho tugambe nawe.”

N'ahabw'ekyyo tukaza ahi ari kandi meeya ogwo yaakora nk'omuvunuuzi wangye. Naabuza omuntu ogwo enzaarwa ku araabe yaabaire ari Omukristaayo. Yaahamya buzima ku yaabaire ari Omukristaayo. Bwanyima naamubuuza ahabw'enki yaabaire aine ekishushani ekirikuramibwa ku araabe yaabaire ari Omukristaayo. Yangarukamu ngu kikaba kiri ekishushani ekyya ishe ekirikuramibwa kandi ngu akakimutsigira. Ku naamugambiire ngu tihariho Omukristaayo oshemereire kugira ebishushani ebirikuramibwa yangarukamu ngu ekishushani eki kikaba kiri ekyy'omugasho gw'amaani ahari ishe. Naagira ekihika ky'okumanya oku kyayambire ishe, reero yangira ngu eizooba rimwe entare ekaba neeshooba kumukwata, n'ahabw'ekyyo yaahemba omuriro reero yaagambira ekyyo kishushani ekirikuramibwa omu muringo ogu omufumu yaabaire amwegyeise. Entare yaahunga. Naamumanyisa ku gwabaire guri omuriro ogwabingire entare ahakuba omuriro gutiinisa enyamaishwa ez'omu ishwa zoon. Tiindyebwa eki yangarukiremu. Akangira ati, “Mbwenu, kiri kiti, Amoya (Omwoyo) ku araaremwe, ekishushani eki tikikaaremwa.”

(Enshoboorora eijwire y'ebyabaireho omu hururu ya Afrika neebaasa kushangwa omu kitabo ekirikwetwa, William Branham, A Prophet Visits South Africa.)

Ago haihi nigo maani gonka agu omutwe muhango gw'Abakristaayo baine ahabw'okuba Ekigambo tikirabareeteirwe kurabira omu rwiigi orwigwire orwabandize orwa Pentekoote.

Hati okugaruka ahaby'orwigi orwigwire orw'abamiishani orw'Obusingye bwa Filadelufia. Tiburagizire orwigi orwigwire orw'amaani agu bwakushemereire kuba bwagizire. Yetegyereze omu mushororongu ogwo Naagamba aha rwiigi oru orwigwire. Naagira ati, “Oine amaani makye.” Ekyyo kihikire. AMAANI g'Omwoyo gakaba nigabura omu busingye obwo. Ekigambo kikabuurirwa kurungi. Kikaba nikibaasiza kimwe kuha obwenge bw'okujuna abantu. Kwonka amaani maingi ga Ruhanga agaayorekire emirimo Ye mikuru, agaafungiize omukono Gwe ahabw'Abe gakaba nigabura kureka omu ubiina obw'abaabaire bataataine. Kwonka nabwo, Ruhanga ahimbisibwe, gakaba nigeeyongyera kandi gakaba geyongyere ahari ago agu baabaire baine omu Kuhunduza.

N'omu busingye obu obu omushaija ou tukira kweta ish'abamiishani yaagiire kubuurira. William Carey, omukozi w'enkaito omunyakyaro, owaabaire ariisa Ekanisa Emwe ey'Ababaputisiti ahari Moulton, Bungyereza, akasisiimura abantu n'amaani maingi ahabw'okubuurira ahari, “yaaba ekiragiro ekyahairwe Entumwa kwegyesa amahanga goona kyabaire kitarikuragiirwa n'aha baheereza boona abaabaire nibaza kukurataho okuhitsya obu ensi egi erihwaho, ahabw'okureeba ku okuraganisibwa okurikukurataho nakwo nikwingana omu kuba okuhikire.” Aba Kaluvini bakamurwanisa abaabaire barengyesereize aha nyegyesa y'okutooranwa nibaikiriza ngu abo boona abarijunwa BARYAJUNWA kandi ngu omurimo gw'abamiishani guhakanisa enkora y'Omwoyo. Kwonka Andrew Fuller akahwera Omwami Carey omu kubuurira kwe n'okurundaana sente. Ebyarugire omu kwehayo kwabo bikatuma ekibiina kyakorwa kujanjaaza Engiri omu mahanga goona, omu mwaka gwa 1792. Ekibiina eki kikoohereza Carey owaabaire naareebwa nk'ohairwe omugisha Ruhanga kujunisa abantu omuri Buhindi. Omu mwaka gwa 1795 Obukristaayo obwasisiimwirwe bukatandikaho ekibiina kya London Missionary Society eki turikumanya gye ku kyashoroize sente miriyoni za pouna, kandi kikoohereza enkumi n'enkumi z'abamiishani omu myaka eyaakuratsireho kuhikiriza ebyetengo bya Mukama. Omwoyo wa Ruhanga akaba naagyendagyenda kandi “Entaama Ezindi” nikubaasa kuba kwabaire kuri okurira kw'emitima y'abo baikiriza abahamize.

“Ntaire omu maisho gaawe orwigi orwigwire.” Niinyenda kureeba ebigambo ebi ogundi murundi. Obwire obu, n'obu ndaabe ntarikwiija kubitaanuura kuruga aha by'abamiishani, ninza kukureetera ekiteekateeko ekirikuhikira kimwe omunda omu busingye bw'aha muheru. Nk'oku mbaire naaherize kugamba, obusingye obu nibuhwererera omu busingye obw'aha muheru. Omu busingye obu nimwo Yesu yaagizire ati, “Niinyija juba” (omushororongu gwa 11), kandi omu busingye bw'aha muheru Akaba naaza “kuheza omurimo, kandi agucwe bugufu omu kuhikiirira: ahabw'okuba Mukama aryakora omurimo omu nsi gw'akaanya kakye.” Abarooma 9:28. Yetegyereze oku omushororongu ogw'omu kitabo ky'Okushuuruurwa 3:8 gurikugamba - “orwigi orwigwire, amaani makye, Ekigambo, Eiziina.” Orwo rwiigi orwigwire rwine akakwate n'ebyo byona bishatu. Hati orwigi orwo nirumanyisa ki? Omuri Yohaana 10:7, nikigira kiti, “Yesu yaagaruka yaabagira ati: Buzimazima Nimbagambara

nti: NIINYE (ORWIGI) RW'ENTAAMA.” Ekyo kihikire: “MBAHO” NIWE rwigu rw'entaama. Hati eki tikiri kigambo ekirikushamaaza kwonka. Buzima eki nikwo kiri. Yetegereze omuri Yohaana 10 Yesu yaaba naaha orufumu oru, Naayeyeta omuriisa. Bwanyima Naayeyeta orwigi. Kandi ekyo nkyo omuriisa ari aha ntaama. Omu mazima omuriisa n'orwigi rw'entaama.

Ku naabaire ndi okwo Oburugwa-izooba nkareeba ngu, omu kiro omuriisa akaba ashorooreza hamwe entaama ze. Akaba azita omu itsibikiro. Bwanyima azibara. Ku yaabaire ahanya ngu zoonza zirimu, akaba abyama omu muryango ogwigwire gw'obutsyo kandi buzima ahinduka orwigi rw'eitsibikiro. Tihariho n'emwe eyaabaire etaahamu nari eshohora atagiikiirize. Akaba ari orwigi. Ekiro ekyakuratsireho nkaba ningyenda n'omunywani omu motoka ya jipu naareeba omuriisa yaatandika kwebembera obusyo bwe naabutaasya omu rurembo. Ahonaaho ebiruka byona ebyabaire nibigenda bikeemerera kugira ngu ezo ntaama zirabeho. Hati endembo ez'okwo Oburugwa-izooba tiziri nk'eza kunu. Itwe eby'okushubura byaitu byona tubita omunda omu nju; kwonka okwo, ni nk'akatare kahango k'abahingi n'ebihingwa byona biri aha rubaraza kugira ngu abarikuhingura babireebe kandi bagure. Nkateekateeka nti, “Oo mugenzi, hanu niho okuyogorekana kutandikira. Rindaho kakye okuhitsya obu ezo ntaama ziraareebe eby'okurya ebyo byona aheeru aho.” Kwonka omuriisa ku yaagu iizemu kwebembera, ezo ntaama zikaguma zimukuratiire ahu yaabaire araba nazo niho zaabaire ziraba. Zikaba zireeba ebyo by'okurya birungi munonga, kwonka tihaine entaama eyaariire ekintu kyona. Oo, kuri noogira ngu nkaba nimmanya orurimi rwabo, nkaba ninza kwemereza ebirikugyenda aha ruguuto reero mbabuurira obutumwa aha bi naabaire naaheza kureeba.

Waaba ori entaama y'Omuriisa Omukuru, Noomukuratira orutambo aha rundi, nk'oku ezo ntaama zaakozire. Torikubaasa kwohibwa kureeba aha rubaju ahabw'ebimuri bihango by'ekanisa, nari kuhurikiza amaraka ga bamwe abaine zaadiguri za D.D. nari Ph.D. nari LL.D., kureka noiya kuguma n'Omuriisa. Baiburi neegamba ngu entaama zimanya eiraka Rye kandi ZIMUKURATIRA, kwonka eiraka ry'ou zitarikumanya rituma zaahunga kandi ziirukira aha Muriisa waazo w'amazima. Ruhanga ahimbisibwe.

Kwonka ebyo tibyo byonka ebi naareebire kandi nkeegayo. Eizooba rimwe nkatandika kuteekateeka nk'oku naabaire ndeere abantu ebiso omu ishwa bariisize amatungo g'emiringo mingi. Omuntu omwe akaba aba naariisa empunu, ondiiyo embuzi, ondiiyo engamiya, ondiiyo enyumbu n'agandi matungo. N'ahabw'ekyo nkabuuza omunywani owaabaire naaturayo, oku baabaire nibeeta abantu abo. “Oo,” yangarukamu ati, “n'abariisa.”

Ekyo tindabaasize kukiikiriza. Naagira nti, “Noomanyisa ngu BOONA n'abariisa? Abariisa bariisa entaama zonka, tikwo?”

Yaagira ati, “Ngaaha, omuriisa n'omureeberezi nari orikuriisa, n'ahabw'ekyo weena orikuriisa amatungo n'omuriisa.”

Mbwenu, ekyo kikantangaaza. Kwonka nkeetegereza omutaano ahagati y'abo bariisa hamwe n'abo abaabaire nibareberera entaama. Ku bwabaire bwira abandi boona bakaba batsiga amatungo gaabo omu ishwa bataaha omu ka kureka omuriisa w'entaama wenka. Omuriisa w'entaama akaba atwara entaama ze, azita omu itsibikiro reero abyama ahansi kandi ahinduka orwigi rw'entaama. Oo, Ruhanga ahimbisibwe, Omuriisa waitu takatutsigahoga nari okutuhemukaho. Obwire bw'ekiro ku burikuhika niinyenda mbe ndi omu itsibikiro Rye. Niinyenda mbe ndi omu kureeberera Kwe.

Hati mbwenu, nitubaasa kureeba ku YESU NIWE RWIGI. Niwe rwigu rw'entaama. Yetegereze ku nikigamba hati aha RWIGI ORURIKWIGUKA. Ekyo niki kutari okushuuruurwa Kwe? Kandi Okushuuruurwa okwo nikwiguka kutureetera amaani, okumurikira Ekigambo n'okuhaisa ekitiinisa Eiziina Rye. Kikabaho ahagati y'obusingye bubiri obw'aha muheru obu Okushuuruurwa kw'Obwaruhanga bwa Yesu Kristo kwayeyongyera kureebeka omu maisho gaitu. Eego, tukaba nitumanya ku Ari Ruhanga. Mbwenu shi Akaabaire ata Omujuni waitu? Kwonka okumanya ku Yaabaire ari RUHANGA KWONKA, NARI RUHANGA WENKA, ngu Akaba ari Alufa na Omega, ngu “Yesu ogu akaba ari BYOMBI MUKAMA KANDI KRISTO” - KIRIKUTUMA YAABA MUKAMA YESU KRISTO, ISHEBOONA, OMWANA N'OMWOYO ORIKWERA, BYONA OMUNTU OMWE - ekyo kikaba kyabuzire kuruga omu busingye bw'okubanza bw'ekanisa, kwonka hati nitukireeba ogundi murundi. Okushuuruurirwa EKI YAABAIRE ARI kukaba kugarukire. Buzima Obwaruhanga ti baperesona bashatu omuri Ruhanga omwe abaine obuntu bumwe, ahakuba nikyetaagisa obuntu kuba omuntu. Ku haraabe hariho obuntu BUMWE, obwo hariho omuntu omwe wenka. Kwonka abo abarikwikiririza omu baperesona bashatu baine baaruhanga bashatu omu Bwaruhanga kandi baine orubanja rw'okuhenda ekiragiro ky'okubanza.

Kwonka okushuuruurirwa kw'Obwaruhanga kugarukire. Hati ekanisa y'amazima neebaasa kwombekwa omu maani ogundi murundi. Ahanyima y'obwire obu bwona aha muheru ekanisa neemanya Mukama waayo. Ogundi murundi NITUBATIZA OMU IZIINA RYA MUKAMA YESU nk'oku baakozire ahari Pentekoote.

Reka mbagambire ekirooto eki Ruhanga yampaire aha bikwatiraine n'okubatiza omu bushatu. Oku kukaba kutari kwerekwa, kureka ekirooto. Nimumanya, nimpamya, ngu gumwe aha migisha y'obusingye bw'ekanisa gukaba guri okutunga ebirrooto ahabw'Omwoyo Orikwera, omu muringo gumwe nk'oku omuntu yaakutunga okwerekwa. Zikaba ziri nka shaaha 9 z'ekiro nibuza kusheesha Orwamukaaga. Nkaba naaheza kwimuka kureetera Yosefu amaizi g'okunywa. Ku naabyamire naagwejegyera ahonaaho naaroota ekirooto eki. Nkareeba omushaija ou naateekateekire ngu ni tata. Akaba ari omushaija muhango w'amaani. Kandi naagaruka naareeba omukazi

owaabaire ashemereire kuba ari maawe, kwonka akaba atarikumushusha, nk'oku n'omushaija yaabaire atarikushusha tata. Omushaija ogu akaba ari mubi aha mukazi we. Akaba aine enkoni mpango eine enshonda ishatu. Noomanya waakwata empimbi okagitebeekanisa aha mutwe haza okagyasa n'empango, neekora omwatse gw'oruku orwine obwogi bw'enshonda ishatu. Enkoni egi nikwo yaabaire eri. Omushaija ogu akaba akwata enkoni egi agimuteeza, agwa ahansi. Omukazi ku yaabaire aba arambiire aho naarira, omushaija ogu akaba agyenda naayetooroora aho atunikire ekifuba kandi ahamaisho ge hakaba hariho endeeba y'amaryo, y'okwehimbisa okuhitsya obu yaarebekire aine amaryo maingi n'okumarwa omu kuteera omukazi ogwo enshoberwa. Buri kaire omukazi ku yaabaire agyezaho kwimuka akaba amuteera. Tindakunzire eki omushaija ogwo yaabaire naakora, kwonka ku naabaire nintekateeka kumuzibira, naayebuuza nti, "Tinkaabaasa kuturukirira oriya mushaija - ni muhango munonga. Kandi ashemereire kuba tata." Kwonka omu mutima nkaba nimmanya ngu akaba atari tata, kandi nkaba nimmanya ngu tihariho omushaija orikwikirizibwa kutwaza omukazi atyo.

Naagyenda naamubakura ekitogi naamuhindura naagira nti, "Torikwikirizibwa kumuteera." Kandi ku naagambire ekyo enyama z'omubiri gwangye zaahaga naashusha nk'ekikaaka. Ogwo mushaija yaazireeba yantiina. Naagira nti, "Waagaruka kumuteera nooza kundeeba." Akeeziringa kugaruka kumuteera, bwanyima naaruga omu kirooto.

Nkasisiimuka ahonaaho ahanyima y'ekyo kirooto. Naateekateeka oku ekyo kirooto kyabaire kiri eky'omutaano. Naayebuuza ahabw'enki ndootsire ahari ogwo mukazi, reero ahonaaho Yaija, kandi naahurira okubaho kwa Ruhanga kwanyijaho atyo Yaamanyisa amakuru g'ekirooto ekyo. (Hati bantu 'mwe nimumanya ngu tinshoboorora ebirooto byanyu kurungi kwonka; kureka emirundi mingi, mingi munonga, mbagambira ebi murootsire mutakabingambiire.) Omukazi ogwo naashushanisa ekanisa y'ensi ebiro ebi. Nkazaarirwa omuri oru ruzambiira - oruzambiira oru ekanisa erimu. Omukazi ogu akaba ashemereire kuba omukazi omuzaire (ni nyina wa baamaraaya). Iba n'ebigombe by'amadiini ebirikugitegyeka. Ogwo mwatse gw'enshonda ishatu n'okubatiza omu bushatu kw'ebishuba niyo tiriniiti. Buri kaire ku yaabaire atandika kwimuka (ekyo nikimanyisa ngu ebibiina by'abaikiriza ku byabaire bitandika kwikiriza amazima) akaba agaruka agituura ahansi n'egyo nyegyesa y'ebishuba.

Akaba ari muhango munonga nangwa omu kubanza nkamutiina, kwonka ku naamurumbire nkashanga naagizire enyama mpango z'omubiri kandi z'amaani. Zikaba ziri ENYAMA Z'OKWIKIRIZA. Ekyarugire omu kirooto kikaba kiri ngu, "obu Ruhanga ari hamwe naanye, kandi arikubaasa kumpa amaani nk'ago, mbwenu ka ndwanirire egyo kanisa mpakanise obushoboorozi bw'ebigombe by'amadiini by'ensi birekye kugiteganisa."

Hati tindikugyezaho kwombeka enyegyesa eyegamiire aha kirooto. Kandi nabwo tindikugyezaho kuhamya enyegyesa yona ei nyemerereire ahabw'ekirooto. Obumwe bw'Obwaruhanga buri hoonahoono okuruga omu kitabo ky'Okutandika 1:1 okuhika omu kitabo ky'Okushuuruurwa 22:21. Kwonka abantu batwire bahumisiibwe ekigunjano kya tiriniiti ky'ediini ekitari mu Byahandiikirwe, kandi ekigunjano ekyo nikiikirizibwa munonga omu nsi yona okuhitsya obu okugyezaho kureeba ngu

"Ruhanga ni Peresona Omwe" haihi n'ekitarikubaasika. Abantu ku baraabe batarikubaasa kureeba AMAZIMA g'Obwaruhanga, kureka bakagarwanisa; tibarikubaasa n'okureeba amazima agandi ahabw'okuba OKUSHUURURIRWA NI YESU KRISTO OMU KANISA YE KANDI N'EMIRIMO YE AHAGATI OMU KANISA AHABW'OBUSINGYE MUSHANJU. Ekyo mwakyetegyerereza? Hati nimpamya ngu mwayetegyerereza.

"Oine amaani makye, okarinda Ekigambo Kyangye, kandi tiwaayehakana Iziina Ryangye." Hati twaheza kugamba oku amaani gaabaire nigagaruka. Gakaba nigagaruka. Obushoboorozi bwa kooti y'ebiragiro eyaatairweho paapa wa Rooma kucwa emishango kandi n'okufubira abo abaabaire batarikwikirizana n'enyikiriza z'ekeleziya bukaba bukyendereire. Abantu bakaba batsigireho ensi z'owaabo kandi baashabisa amaani obugabe bw'okuramya. Omugamba gw'abakuru b'ediini omu bitiinisa byabo ebirikukirakirana gukaba niguhendwa. Zaagavumenti zikareeba kiri eky'obwengye okutahondanisa ebibiina. Buzima, hakaba hariho abantu abaabaire baine ekigyendererwa kirungi kandi beeteekateekire kutandika orugamba kurwanirira obugabe bwabo bw'okuramya kwonka bakaba baine obwebembezi bubi. Shana okworeka kw'amaani g'ediini okurikukirayo omu busingye obu kukaba kuri ngu, n'obu Bufaransa yaagwire omu bunaku bw'empindahinduka omu by'obutegyeki, okusisiimuka kw'amaani kwa Wesili kukazibira egyo mpindahinduka tiyaahika Bungyereza kandi kwagijuna kugira ngu ebe ekikoreso omu mukono gwa Ruhanga okumara emyaka mingi y'ekitiinisa.

Okubuurira kw'Ekigambo kukaba kutakabaga okw'amaani nka hati. Sitaane ku yaimukize abantu baingi abarikwegunzira enteekateeka zaabo ezitaanukaine n'ediini, abatandiki b'obukomyunisiti ku baimukire, abatendekirwe omu by'ediini abatahamire ku baajanjaarize ebiteekateeko byabo ebisiisikaire, Ruhanga akaimutsya abarwani b'amaani b'okwikiriza, kandi emirimo erikukirayo obukuru ey'ebihandiiko by'Ekikristaayo hamwe n'okwegyesa n'okubuurira bikaruga omu busingye obu. Ababuurizi n'abeegyesa b'obusingye obu tihaine obu baaringainwe kandi tibaringanwa. Ba Spurgeons, Parkers, McClarens, ba Edwards, Bunyans, Meullers, Brainards, Barnes, Bishops, boona bakaruga omu busingye obu. Bakabuurira, baayegyesa kandi baahandiika Ekigambo. Baahimbisa Eiziina Rye.

OKUCWERWA ORUBANJA KW'OMUYUDAAYA W'EBISHUBA

Okushuuruurwa 3:9, "Mbwenu reeba, Naakuha ab'omuri sinagogi ya Sitaane, abeeyeta Abayudaaya, haza

batari bo, nibabeiha; Ndyabagyema baije bainame omu maisho gaawe, babone kumanya ku Naakukunzire.”

Hati nitubaasa ahonaaho kwetegyereza ngu oburemeezi obu bw'Omuyudaaya w'ebishuba nari abaikiriza b'ebishuba bukaba bwabaireho omu busingye bwa kabiri. Aba abaayeyetsire Abayudaaya omu buryo bw'ebishuba bakareebeka juba ahanyima y'okushukwaho kw'okubanza kw'obusingye bw'okubanza, kandi hati nibareebeka ogundi murundi omu busingye bwa kabiri ahanyima y'okuhunduuza. Omu mazima eki tikifiire kubaho. Buzima, tikifiire kubaho. N'entwaza ya Sitaane. Entwaza egyo n'ey'okwekoramu ekibiina ky'ediini kityo kikagira ngu nikyo kyabandize n'ahabw'ekyo ngu kiheebwe obugabe bw'omutaano n'ekitiinisa. Reka mboorekye. Enyima okwo omu Busingye bwa Sumuruna abantu aba bakabeiha baagira ngu buzima n'Abayudaaya (nari abaikiriza) kunu omu bwijwire bataribo. Bakaba bari aba sinagogi ya Sitaane. Bakaba bari ekibiina kya Sitaane, ahakuba omu busingye obwo nimwo twareebire okutandika kw'abantu omu buheereza nibeeta omu bwebembezi obutahikire bw'okuba bakuru b'ab'eishe-emwe abaheereza bagyenzi baabo. (Baabishopu bakateebwa omu byanga, ahaiguru y'abakuru b'ekanisa). Ekintu ekindi eki twareebire kikaba kiri ngu omu busingye bwa kashatu buzima hakabaho omwanya ogurikwetwa “ekitebe ky'obukama bwa Sitaane.” Obusingye obwo bukatuha ekanisa okushwerwa gavumenti. Ekanisa obwo erikushagikwa ab'obushoboorozi omu gavumenti buzimazima ekaba etarikubaasa kusingurwa. Kwonka Ruhanga akacwa egyo nkomo n'obu haraabe haabaire hariho obushoboorozi bwa gavumenti reero okuhunduuza kwareeta omushana mwingi. Kwonka n'enki ekyabaireho? Aba Luteeri bakeekoramu ekibiina kandi baayegaita na gavumenti kandi nitugaruka tureeba sinagogi ya Sitaane neeyeyoreka omu busingye obu obwa mukaaga. Hati n'eky'amazima ekibiina eki kya sinagogi tikikaagambire ngu n'ekya Sitaane. Ngaaha sebo. Nibagira ngu n'aba Ruhanga. Kwonka nibabeiha. Ahakuba ogwo ori Omuyudaaya w'amazima (okwo nikwo barikwegamba kuba) niw'ogwo ori Omuyudaaya omunda - omu Mwoyo. N'ahabw'ekyo ku baraabe bari Abayudaaya b'ebishuba nikimanyisa ngu bari nk'oku Yuda 19 harikugira ngu, “ABATAINE Mwoyo.” Abaana ba Ruhanga bazaarwa Omwoyo. Aba tibaine Omwoyo n'ahabw'ekyo TIBARI baana ba Ruhanga n'obu baakuhakana n'amaani bata kandi n'obu baakutwara omwanya muraingwa nibagyezaho kuhamya ngu nibo. BAFIIRE. N'abaana b'ekibiina ky'ediini, kandi ebyana by'amazima tibabiine. Bombekirwe aha nyikiriza z'amadiini gaabo, ebigunjano hamwe n'enyegyesa kandi amazima tigabarimu ahabw'okuba batwaire obwengye bwabo okukira Ekigambo kya Ruhanga.

Reka nkwoorekye eki mbaire ningyezaho kwegyesa obwire bwona aha mizaabibu ebiri erikuruga omu myoyo ebiri etarikushushana. Twara eky'okureeberaho kya Yesu na Yuda hati. Yesu akaba ari Omwana wa Ruhanga. Yuda akaba ari omwana w'okuhwerekerera. Ruhanga akataaha omuri Yesu. Sitaane yaataaha omuri Yuda. Yesu akaba aine obuheereza bwijwire bw'Omwoyo Orikwera ahakuba “Yesu owa Nazareesi, oku Ruhanga yaamushukireho Omwoyo Orikwera n'amaani, Akagyendagyenda naakora ebirungi, naakiza boona abaabaire nibaitwa kubi sitaane; ahabw'okuba Ruhanga akaba ari hamwe Nawe.” Ebyakozirwe 10:38. Nikigira kiti, “Ahabw'okuba akaba (Yuda) naabarirwa hamwe naitwe, yaaheebwa OMUGABO gw'obuheereza obu.” Ebyakozirwe 1:17. Matayo 10:1, “Yaayeta abeegi Be ikumi na babiri, Yaabaha obushoboorozi bw'okubinga baadaimoni, n'okukiza endwara zoonna n'obumuga bwona.”

Omwoyo ogwo ogwabaire guri omuri Yuda gukagumirizamu kimwe omu buheereza bwa Yesu. Bwanyima bombi bakahika aha musharaba. Yesu akahanikwa aha musharaba, yaahayo amagara Ge ashemereirwe ahabw'abasiisi kandi Yaahayo Omwoyo We ahari Ruhanga. Omwoyo We akaza ahari Ruhanga bwanyima gwashukwa omu kanisa ahari Pentekoote. Kwonka Yuda akeehanika kandi omwoyo gwe gwagaruka ahari Sitaane, kwonka ahanyima ya Pentekoote omwoyo ogwo ogwabaire guri omuri Yuda gukagaruka aha muzaabibu ogw'ebishuba ogurikukurira hamwe n'omuzaabibu gw'amazima. Kwonka yetegyereze, omwoyo gwa Yuda tigurahikire ahari Pentekoote. Tigurahikire aha kutunga Omwoyo Orikwera. Gukaba gutarikubaasa. Kwonka ogwo mwoyo gwa Yuda gukaza kusherura ki? Gukaza kusherura enshaho y'ezaabu. Ka gwabaire nigukunda sente. Na hati nigukikunda sente. Ku gurikugyendagyenda omu Iziina rya Yesu nigukora ebintu bikuru kandi nigutaho enteerane mpango, nabwo nigukora sente nyingi hamwe n'ebiyombeko, n'obwegyese kandi na buri kintu kyona gwine ekiteekateeko ky'ebintu by'ensi. Hanga amaisho ogwo mwoyo kwonka ogubariho kandi otabeihwabeiha. Yuda akagyendagyenda nk'omwe ahari ikumi na babiri kandi nawe, yaakora eby'amahano. Kwonka akaba ATAINE Omwoyo wa Ruhanga nk'owe. Akaba aine obuheereza. Tarahikire ahari Pentekoote ahabw'okuba akaba atari mbibo y'amazima. Akaba atari mwana wa Ruhanga w'amazima. Ngaaha sebo. Kandi nikwo kiri na hati omuri sinagogi ya Sitaane. Otabeihwabeiha. Torikwija kubeihwabeiha ku oraabe ori egyo ntoore buzima. Yesu akagira ngu torikwija kubeihwabeiha.

Eego, abantu aba nibagira ngu n'Abakristaayo kwonka tibari bo.

“Ndyabagyema baije bainame omu maisho gaawe, babone kumanya ku Naakukunzire.” 1 Abakorinso 6:2, “Timurikumanya ngu abarikwera nibo baricwera ensi orubanja?” Tiharibayo entumwa ikumi na ibiri zonka aha bitebe by'obukama ikumi na bibiri nizicwera emanja enganda ikumi na ibiri za Israeli kwonka, kureka abarikwera, nabo, baryacwera ensi orubanja. Obwo nibwo aba abarikwegambaho ngu n'aba Ruhanga kandi bakeegambaho ngu Ruhanga n'abakunda nibwo barimanya buzima n'oha omwana wa Ruhanga kandi n'oha ou Omwana arikukunda. Eego, ekiro ekyo nikijja obu ekyo kiryorekwa. Aba abarikutegyeka ensi hati omu rugyero nanka, abu omu busingye bw'aha muheru baryombekyera enyamaishwa ekishushani obwo buzima baryategyeka ensi, eizooba rimwe baryagarurwa ahansi Yesu ku ariija n'abarikwera Be kuwera ensi orubanja omu kuhikiirira. Ekyo nikyo buzima twareebire omuri Matayo 25 obu “Boona” abatarabaire omu kuzooka kw'okubanza baryemerera

omu maisho g'Omucwi w'emanja n'Omugore We.

OKUSIIMA N'OKURAGANISA

Okushuuruurwa 3:10, “Iwe okarinda Ekigambo eki waagambiirwe aha by'okugumisiriza Kwangye; Naanye nikyo Ndikurindira omu bunaku bw'okutegwa okuriija omu nsi yoona, okugyeza boona abagituuramu.”

Naamanyisa ki ku arikugira ngu “n'Ekigambo ky'okugumisiriza Kwangye”? Abaheburaayo 6: 13-15. “Ahakuba Ruhanga, obu Yaaraganisa Abrahamu, Akeerahira, ahabw'okutagira w'okurahira orikumukira, naagira ati: Buzima okukuha Ndyakuha omugisha, kandi n'okukukanyisa Ndyakukanyisa. Nikwo Abrahamu yaahairwe atyo eki yaaraganisiibwe, ku yaaherize kugumisiriza obutaruha.” Nooreeba Omwoyo naagamba aha Kigambo kya Ruhanga eki tuhairwe. Okutegyezeza okuhikiirira kw'Ekigambo ekyo kikaba nikyetaagisa okugumisiriza nk'oku kyabaire n'ahari Abrahamu. Akagumisiriza nk'orikureeba Ogwo otareebwa. Akagumisiriza reero aha muheru Ekigambo kyahikiirira. Obu nibwo buryo obu Ruhanga ayegyesezamu abantu Be kugumisiriza. Nooreeba, ku Yaakuhikiiriza Ekigambo Kye naakyorekyeraho ahonaaho waaheza kushaba, tihaine obu waakwega kugumisiriza, kureka okaayeyongyera munonga kuba otarikugumisiriza omu magara. Reka nkworekye amazima aga agoorekyeirwe kimwe. Abaheburaayo 11:17, “Ahabw'okwikiriza, Abrahamu ku yaagyeziibwe, yaahayo Isaaka; kandi owaahairwe ebyaraganisiibwe (Ekigambo kya Ruhanga) yaikiriza kuhayo omwana we omwe nyamunegyere.” Nkikyo aho: Abrahamu akagyeziibwa AHANYIMA y'okutungira Ekigambo ky'Okuraganisibwa. Abangi bateekateeka ngu ahonaaho ku tushaba omu Iziina rya Yesu twegamiire aha kuraganisa kurungi kwa Ruhanga ngu tiharikubaasa kubaho okugyeziibwa. Kwonka hanu nikigira ngu Abrahamu akagyeziibwa ahanyima y'okuraganisibwa. Ekyo kihikiire kimwe okurugiirira n'aha mweshongozi wa Zaaburi naagamba ahari Yosefu, 105:19, “Ekigambo kya MUKAMA kikaguma nikimugyeza, okuhitsya obu eki yaagambire kyabaireho.” Ruhanga aturaganisa ebintu bikuru munonga kandi eby'omuhendo buzima. Akaraganisa okubihikiiriza. Naija kukikora. Kwonka okuruga aha bwire obu turikushaba okuhitsya aha bwire obu tugarukwamu nituteekwa kwega kugumisiriza omu myoyo yaitu ahabw'okuba omu kugumisiriza honka nimwo tutungira amagara. Ruhanga atuhwere kwega eishomo eri nk'oku turikumanya oku abantu b'obusingye obu obwa mukaaga baayegire okugumisiriza. Nitushoma ebyafaayo by'amagara g'Abakristaayo aba ab'amaani; ka nitureeba entaaniso ahagati y'amagara gaabo n'agaitu ahabw'okuba bakaba bagumisiriza munonga kandi bacureire, kwonka itwe ebiro ebi nitusingurwa ahabw'okutagumisiriza okurengesereize n'okurahukiriza.

Naagumizamu naabagambira ati, “Ahabw'okuba okakiira Ekigambo Kyangye kandi waakituura, kandi omu buryo obwo waagumisiriza, Naanye nikyo Ndikurindira omu bunaku bw'okutegwa okuriija omu nsi yoona, okugyeza boona abagituuramu.” Hati hanu nitugaruka tureeba obusingye bumwe nibutaaha omu bundi; ahakuba okuraganisa oku kwine akakwate n'omuheru gw'obwire bw'Abanyamahanga oburikuhenderera omu Kubonabona Kwingi.

“Naanye nikyo ndikurindira omu bunaku bw'okutegwa okuriija omu nsi yoona, okugyeza boona abagituuramu.” Omushororongo ogu ti kurangirira ngu ekanisa y'amazima n'eija kuza kandi eraabe omu kubonabona. Kuri gwabaire nigumanyisa ekyo gukaakigambire. Kwonka nigugira guti, “Naanye nikyo ndikurindira omu bunaku bw'okutegwa.” Okutegwa oku nikushushanira kimwe n'okutegwa kw'omuri Edeni. Nikwija kuba kuri ebigambo ebirikushemeza kwonka birikuhakanisa butunu Ekigambo kya Ruhanga ekyaragiirwe, kwonka kandi kurugiirira aha miteekateekyere y'obuntu nibiija kuba bihikiire kimwe munonga, birikwigura amaisho kandi birikuha amagara, nikwo bibone kubeihabeiha ensi. Entoore zonka nizo zitaribeihiwabeiha. Okutegwa kuryabaho kuti. Enkora erikushagika okwegaita kw'amakanisa etandikiire aha kirikushusha nk'ekintu kirungi kandi entwanza ehairwe omugisha (kuhikiiriza okushaba kwa Kristo ngu twena tube bamwe) nehinduka ey'amaani munonga omu by'obutegeyeki okuhitsya obu erikugyemesereza gavumenti kutuma boona baagyegaitaho yaaba bwerure nari shi okurabira omu kuramatira aha ntwaza ezitairwe omu kiragiro nikwo hatabaho abantu abaayemerwa nk'amakanisa agahikire gaaba omu buryo bumwe nari obundi gatari ahansi y'obutegeyeki bw'akakiiko aka. Obubiina bukye nibwija kufeerwa ebihandiiko ebirikubwikiriza kubuurira, emigisha, n'ebindi, okuhitsya obu burifeerwa ebintu byona hamwe n'obugabe bw'eby'omwoyo omu bantu. Eky'okureeberaho, na hati ekibiina ky'abaheereza b'ekyanga ku barikuba batasiimire, omuntu takaabasa kupangisa ekyombeko ahabw'omurimo gw'eby'ediini, omu ndembo nyingi, nari ezirikukirayo obwingi. Kugira ngu obe omushomesa w'ediini omu mahe, amarwariro, n'ebindi, hati haihi nikiragiirwa kuba noomanywa ku oikiriziibwe ebibiina by'obumwe bw'amakanisa g'obushatu. Okugyema oku ku kuraayeyongyere, kandi nikwija kweyongyera, nikiija kugumira kimwe kukwangira, ahakuba okukwangira n'okufeerwa obugabe. Kandi baingi nibaija kwohibwa kukwatanisa, ahakuba nibaija kuhurira kiri kirungi kuheereza Ruhanga butunu omu ntwaza y'ekigombe ky'ediini eki kukira okutaheereza Ruhanga na kakye omuri rufaayo. Kwonka bahabire. Kwikiriza ekishuba ky'omubi n'okuheereza Sitaane, n'obu waakwenda kumweta Yehova. Kwonka entoore tizirihabisibwa.

Okwongyeraho, entoore tiziririndwa kwonka, kureka omugyendo ogu obu gurihinduka “EKISHUSHANI EKIKOZIRWE AHABW'EGYO NYAMAISHWA,” abarikwera nibaija kuba baagiire omu kutwarwa. Kandi omugyendo ogu omukye ogurikushemeza, kandi ogurikushamaaza ogwatandikiire omu kukwatanisa omuri Efeso nigwija kuba ekintu kihango kibi kya Sitaane ekirikushiisha kandi kikahabisa ensi yoona. Ahakuba entwaza y'Ekanisa y'Abakatoriki eya Rooma hamwe n'Abapurotesitante omu kwegaita hamwe nibaija kutegyeka obutungira bwona bw'entwaza y'ensi kandi bagyeme ensi yoona kutaaha omu mutego gw'ediini yaabo, nari babaite, omu buryo bw'okubaima obugabe bw'okugura n'okuguza ebyakubaire nibibabaisaho. Eki nikiija kwanguha kukorwa,

ahakuba bahara ba maraaya boona bamugarukiire. Kikiri kitsyo, Rooma yaatungire haihi ezaabu yoona. Abayudaaya baine endagaano ezaahandiikirwe hamwe n'ebihandiiko byona. Omu bwire obuhikire, ogwo maraaya naija kuhwerekyereza entwaza y'ebya sente eriho ebiro ebi naayegarurira empapura zoonza, kandi naaragiira ngu aheebwe ezaabu. Ezaabu etakiriho, entwaza neija kusheeniyuka. Abayudaaya nibaija kutegwa bakwatanise, kandi ekanisa maraaya egyo neija kutegyeka ensi yoona.

OKURAGANISA ABE

Okushuuruurwa 3:11-12, “Niinyija juba; gumiza kimwe eki oine, hatagira owaakwaka ekirunga kyawe. Orikusingura Ndyamugira enyomyo omuri hekalu ya Ruhanga Wangye; nawe tarigirugamu ebiro byona; kandi Ndyamuhandikaho Eiziina rya Ruhanga Wangye, n'eiziina ry'orurembo rwa Ruhanga Wangye, nirwo rurembo Yerusaaumu orusya orurikushuuma okuruga omu iguru ahari Ruhanga Wangye, kandi n'Eiziina Ryangye erisya.”

Titurikwetenga kugamba aha kiteekateeko ekirikugira ngu Naija juba. Nitumanya ngu Naija juba ahabw'okuba turi aha muheru gw'ebiro by'aha mperu, tikwo? Kwonka Naagumizamu naagira ati, “Gumiza kimwe eki oine, hatagira owaakwaka ekirunga kyawe.”

N'ahagati y'obwire bw'akabi kaingi ahu Yesu araizire. Kandi omu kwija Kwe haryabaho okuzooka. Baingi nibaija kuruga omu mucuucu batembe n'abo abariba bahuriire kwonka bategyereize okugaruka Kwe. Kandi aba baryaheebwa ebirunga. Ahabw'enki? Ahabw'okuba n'abaana ba Ruhanga. N'abagabe hamwe Nawe. Nibategyeka Nawe. Ekyo nikyo ekirunga kirikumanyisa - okwema aha ngoma kandi n'okutegyeka n'Omugabe Mukuru, We wenka. Okwo nikwo kuraganisibwa ahari abo boona abarikubonabona Nawe hanu omu nsi - abo boona abaayehangaine n'okugumisiriza barikumanya ngu Ruhanga, ogwo Omucwi w'emanja z'Oburyo aryabaha ebihembo. Abo abaikiriize kufeerwa byona Ahabwe kandi Abaamurekuriire byona baryashutama omu kitebe Kye eky'obukama kandi babagane omu bugabe Bwe bw'ekitiinisa.

Oo, twine ekigambo kyaitu twena obwire obu. Kiri ngu gumiza kimwe - yehangaane. Otarekyer'aho. Kwata eby'okurwanisa byona ebya Ruhanga - tukorese eky'okurwanisa kyona eki Atuhaire - tukorese buri kiconco eki twine kandi tureebe omumaisho n'okushemererwa, ahabw'okuba Ogwo ori Omugabe w'Abagabe kandi Omukama w'Abakama naija kutujweka ebirunga.

Hati Tarikuha birunga kwonka kureka Naagamba ku aba abari omu mugore baryahindurwa enyomyo omuri hekalu ya Ruhanga. Kwonka hekalu ya Ruhanga niki? Yesu akagamba aha mubiri Gwe ku ni hekalu. Gukaba guriyo. Gukaba guri hekalu ya Ruhanga. Kwonka hati obu turi omubiri Gwe, ekanisa y'amazima ni hekalu ya Ruhanga ahabw'Omwoyo Orikwera ori omuriitwe. Hati orikusingura Naija kumuhindura enyomyo omuri egyo hekalu. Kwonka enyomyo niki? Enyomyo omu mazima n'ekicweka ky'omusingye ahabw'okuba ekwatirira ekyombeko kyona. Ruhanga ahimbisibwe, ekyo nikigaitera hamwe orikusingura hamwe n'entumwa na baanabi, ahabw'okuba nikigamba omu Baefeso 2:19-22, “N'ahabw'ekyo timukiri banyamahanga nari abahinguzi, kureka muri abanyarurembo hamwe n'abarikwera, kandi ab'omu kikaari kya Ruhanga, mwombekirwe aha musingi gw'entumwa na baanabi, kandi Kristo Yesu niwe ibaare ery'obuhamizo; Omuriwe ekyombeko kyona nikiteeranwa gye, kikura kiba hekalu erikwera omuri Mukama; naimwe mwombekirwe hamwe Omuriwe kuba omwanya gwa Ruhanga ogw'okutuuramu omu Mwoyo.” Eego, ogwo mushororongo gwa 22 nigugamba ngu twombekirwe hamwe nabo. Buri omwe akaraba omu IREMBO (Yesu) kandi n'ekicweka ky'ogwo mubiri nari hekalu. Hati Ruhanga ku ata omuntu omuri hekalu nk'enyomyo kandi yaamuhindura ekicweka ky'ekibiina ky'abo abakozire ogwo musingi n'aba Naakora ki? Naaba namuheereza okushuuruurwa kw'Ekigambo hamwe n'Okwe wenka, ahabw'okuba ekyo buzima nikyo entumwa na baanabi baabaire baine. Matayo 16:17. Ngugwo aho ari omu Kigambo ekyo. Omwo nimwo Ayemereire. Tihariho orikubaasa Kumwihamu.

Teekateeka aha kigambo ekyo, “orikusingura.” Yohaana naabuza ekibuuzo ati, “N'oha orikusingura?” kandi eky'okugarukamu kiizira kimwe ngu, “N'omuntu weena oikiriza ku Yesu ni Kristo.” Tarikugamba ngu orikusingura n'ogwo orikwikiriza Yesu “Owaaboneka weena” n'Omuri Kristo “Owaaboneka weena,” kureka orikwikiriza ngu Yesu NIWE KRISTO - omuperesona OMWE - batari babiri. Niwe ogwo obatiziibwe omu Iziina rya Mukama Yesu Kristo.

Hanu Ruhanga naagamba aha mugore. Nooyenda kureeba ekindi kishushani ky'omugore? Kiri kunu omu kitabo ky'Okushuuruurwa 7:4-17, “Naahurira omubaro gw'abaatairweho akamanyiso, ogwabaire guri akasiriira n'obukumi buna n'enkumi ina, abaarugire omu nganda zoonza ez'abaana ba Israeli; ab'omu ruganda rwa Yuda abaatairweho akamanyiso bakaba bari kakumi n'enkumi ibiri, ab'omu ruganda rwa Reubeeni kakumi n'enkumi ibiri, ab'omu ruganda rwa Gaadi kakumi n'enkumi ibiri, ab'omu ruganda rwa Asheeri kakumi n'enkumi ibiri, ab'omu ruganda rwa Nafutaali kakumi n'enkumi ibiri, ab'omu ruganda rwa Manaase kakumi n'enkumi ibiri, ab'omu ruganda rwa Simeoni kakumi n'enkumi ibiri, ab'omu ruganda rwa Leevi kakumi n'enkumi ibiri, ab'omu ruganda rwa Isakaari kakumi n'enkumi ibiri, ab'omu ruganda rwa Zebuluuni kakumi n'enkumi ibiri, ab'omu ruganda rwa Yosefu kakumi n'enkumi ibiri, n'ab'omu ruganda rwa Benyamiini abaatairweho akamanyiso nabo kakumi n'enkumi ibiri. Bwanyima y'ebyo ku naimukize amaisho, naareeba omutwe muhango gw'abantu ogu omuntu atarikubaasa kubara, abaarugire omu mahanga goona n'enganda zoonza n'abantu boona n'endimi zoonza, beemereire omu maisho g'ekitebe ky'obukama n'omu maisho g'Omwana gw'Entaama, bajwaire ebijwaro birikwera, baine amataagi g'enkindo omu ngaro zaabo, nibagamba n'eiraka rihango bati: Okujuna n'okwa Ruhanga waitu,

oshutami aha kitebe ky'obukama, kandi n'okw'Omwana gw'Entaama. Kandi baamaraika boona abaabaire beemereire, beehinguririize ekitebe ky'obukama n'abakuru n'ebihangirwe ebiine amagara ebina, baagwa ahansi, baajuumara omumaisho g'ekitebe, baaramya Ruhanga, nibagira bati: Amiina! Ruhanga waitu aheebwe omugisha n'ekitiinisa n'obwengye n'okusiimwa n'okuhimbisibwa n'obushoboorozi n'amaani ebiro n'ebiro, Amiina. Kandi omwe aha bakuru abo yambuuza, naagira ati: Aba abajwaire ebijwaro ebirikwera ni baahi, kandi nibaruga hi? Naanye naamugarukamu nti: Mukama wangye, niwe orikumanya. Yangira ati: Aba nibo abaarugire omu kubonabona kwingi, bakoozya ebijwaro byabo omu shagama y'Omwana gw'Entaama, bikeera. Nikyo bagumira omu maisho g'ekitebe kya Ruhanga eky'obukama nibamuheereza omuri hekalu Ye nyomushana na nyekiro; kandi Ogwo oshutami aha kitebe ky'obukama aryabasangira n'eihema Rye. Tibarigira njara bundi, n'obu ryakuba eiriho; tibariitwa mushana, n'obu kyakuba ekibabo kyagwo; ahabw'okuba Omwana gw'Entaama ori aha kitebe ky'obukama aryaba omuriisa waabo; Aryabeebembera abahitsye aha nshuro z'amaizi g'amagara; kandi Ruhanga aryaragaza amarira goona aha maisho gaabo." Yesu aizire. Yaaherize okuta akamanyiso ahari 144,000. Akaiha 12,000 omuri buri ruganda. Kwonka hariho ekibiina ekindi ekitarikubarirwa omuri aba 144,000 ekirikureebwa omu mishororongo 9-18. Ni baahi? Aba n'abari omu mugore abahirwe omu Banyamahanga. Bari omu maisho g'ekitebe Kye ky'obukama nyomushana na nyekiro. Nibamuheereza omuri hekalu. Mukama naabareeberera omu muringo gw'omutaano. Ogu n'omugore We.

Omugore aza hoona ahu Kishwera ari. Kishwera tarimutsigaho. Omugore tarimuruga aha rubaju. Omugore aryashutama na Kishwera aha kitebe ky'obukama. Omugore aryajwekwa ekirunga ky'oburungi Bwe n'ekitiinisa.

"Kandi Ndyamuhandiikaho Eiziina rya Ruhanga Wangye, n'eiziina ry'orurembo rwa Ruhanga Wangye." Kandi Eiziina rya Ruhanga ni riha? Mpaho, Akaba ari Ruhanga arinaitwe, nari Emanueli, kwonka eryo tiry eiziina Rye Eryamuhairwe. "Oryamweta Eiziina Yesu." Yesu akagira ati, "Nyizire omu Iziina rya Tata, Timwanyakiira." N'ahabw'ekyo Eiziina rya Ruhanga ni YESU, ahakuba eryo niryo Eiziina eri Yaiziiremu. We ni MUKAMA YESU KRISTO. Omukazi ayetwa iziina ki ku ashwerwa omushaija? Ayetwa eiziina ry'iba. N'Eiziina Rye eririheebwa omugore ku Arimwegarurira.

Okushuuruurwa 21:1-4, "Bwanyima naareeba eiguru erisya n'ensi ensya; ahakuba eiguru ery'okubanza n'ensi ey'okubanza bikaba bihweireho, n'enyanja etakiriho. Kandi (nyowe Yohaana) naareeba orurembo orurikwera Yerusaalemu orusya, nirushuuma okuruga omu iguru ahari Ruhanga, ruteekateekirwe nk'omugore ocumiirwe iba; naahurira eiraka rihango niriruga omu kitebe ky'obukama nirigira riti: Reeba, eihema rya Ruhanga riri omu bantu. Ruhanga aryatutura nabo; baryaba abantu Be, kandi We wenka aryaguma nabo, ari Ruhanga waabo; aryaragaza amarira goona ahamasho gaabo; tiharibaho kufa bundi, n'obu kwakuba okucura nari okurira nari obusaasi, ahakuba ebya ira biryaba bihweireho." Ka n'eky'okutangaaza. Okuraganisa okurikutangaaza kwa Ruhanga kwona kuhikiriire. Byona biryaba bihweire. Empinduka eryaba yaahweire. Omwana gw'Entaama n'omugore We bahuumuriire omu kuhikiriira kwona kwa Ruhanga ebiro n'ebiro. Okaakishoboorora? N'oha orikubaasa kukora ekyo? Tihariho n'omwe. Okaakiteekateekaho? Okaakirootaho? Oshome eki Ekigambo kirikukigambaho? Eego nitubaasa kukora ebyo byona, kwonka nabwo nitubaasa kumanyaho akacweka akarikukirayo obukye k'ekicweka kyakyo okuhitsya obu kiribaho omu kuzooka kw'okubanza.

"Kandi Ndyamuhandiikaho Eiziina ryangye ERISYA." Eiziina Ryangye Erisya. BYONA ku birihinduka bisya, obwo Aryagira Eiziina risya kandi Eiziina eryo nirijja kuba Eiziina ry'omugore nawe. Eiziina eryo eki riri, tihariho n'omwe owaakubaasa kwehanga kuriteebereza. Nikwija kuba okushuuruurirwa kw'Omwoyo okuhairwe hatariho kubanganisa okuhitsya obu hatarigira n'omwe owaayehanga kukuhakanisa. Kwonka tihariho kubanganisa okwo kushuuruurirwa Naija kukureka okuhitsya aha kiro eki Arisiima kuha eryo iziina. Nikimara okumanya ngu nikijja kuba eky'okutangaaza munonga okukira oku turateekateekire.

OKUHABURA OKW'AHA MUHERU AHA BUSINGYE

Okushuuruurwa 3:13, "Oine amatu, ahurire eki Omwoyo arikugambira amakanisa." Buri busingye nibuhereeruka n'okuhabura oku okurikushushana. N'okweshengyereza kw'obutoosha ngu amakanisa gahurire eiraka rya Mukama. Omu busingye obu okweshengyereza nikweyongyera munonga okukira omu busingye obwabandize, ahakuba omu busingye obu okwija kwa Mukama buzima kwiriire haihi. Ekibuuzo nikibaasa obundi kwimuka kiti, "Ku haraabe hariyo obundi busingye, obwira n'obw'enki?" Eky'okugarukamu kiri hanu. Obusingye bw'aha muheru nibwija kuba bugufu - omurimo gw'obwira gw'okumariiriza. Kandi eki tikwo kiri kwonka, kureka omuntu burijjo ashemereire kwijuka ngu omu maisho ga Ruhanga obwire niburahuka kuhwaho; eego, emyaka rukumi ni nk'ekiro kimwe. Kandi ku Araabe Naija omu shaaha nkye nk'oku Areeba obwire, mbwenu buzima Naateekwa kutuhabura n'obwira bwona kandi Eiraka Rye nirateekwa kugumizamu nirigambira omu mitima yaitu kweteekateekyera okwija okwo.

Oo, hariho amaraka maingi omu nsi - oburemeezi bwingi hamwe n'ebyetengo ebirikwetengwa kuteebwaho omutima; kwonka tiharibaho eiraka rikuru kandi erishemereire kuteebwaho omutima nk'eiraka ry'Omwoyo. N'ahabw'ekyo, "Oine amatu g'okuhurira, ahurire eki Omwoyo arikugambira amakanisa."



www.messagehub.info

Obutumwa obu bukabuurirwa
William Marrion Branham
“... omu biro by'eiraka ...” Kush 10:7